

原

富

原富部丁目錄

引論

篇一論商宗計學之失

篇二論沮抑外貨不使爭銷之政

篇三論兩國通商以進出差爲負而設法沮抑來貨之非

一其非理自商宗計學之說觀之而見者

二其非理自常道觀之而見者

篇四論釐還稅

篇五論獎外輸

一論穀麥商務及英國穀法

篇六論通商條約

篇七論外屬

一論新地之盛之由

二論美洲既通印度海道亦達歐洲四之所獲之大利

篇八結論通商計學之旨

篇九論農宗計學

原富部上

英倫斯密亞丹原本

侯官嚴復幾道翻譯

引論

計學者。制治經國之學之一支。其所講求者二。一曰足民食。次曰富國用。計學之所求。在君民各足而已。世異民殊。國之進於富厚者各異。故言計學者有二宗焉。而皆以足民爲本。曰商宗。曰農宗。二者皆予所欲明辨而詳言者。則請先言商宗。蓋商宗差晚出。而吾黨英人事效當前。易明曉耳。

案斯密氏計學界說如此。而後人病其渾悅。著論說者希復用之。今計學界說曰。計學者。所以釐生財分財用財之理也。其於義進矣。而名學家病其所用生分用三名之多歧義。則又曰計學者。所以講鼓功被物而興易值之力理者也。進而彌精。非明格致者未易猝解矣。蓋斯密氏所標。聊用明旨。本非界說正門。其所以爲

渾悅者。以嫌其與經濟全學相混。（日本已謂計學爲經濟學矣。）英儒賓德門經濟界說。謂其術所以求最大之福。福最衆之人。如用斯密氏之義。則足民一語。必合德行風俗智力制度宗教數者而言。其說始備。顧計學所有事者。實不外財富消長而已。故曰渾也。又足民富國者。本學之所嚮而所探討論證者。財之理與相生相養之致也。而斯密氏獨標所求。不言所學。故曰悅也。至譯此爲計學。而不曰理財者。亦自有說。蓋學與術異。學者考自然之理。立必然之例。術者據既知之理。求可成之功。學主知。術主行。計學學也。理財術也。術之名必不可以譯學。一也。財之生分理積。皆計學所討論。非理之一言所能盡。二也。且理財已成陳言。人云理財。多主國用。意偏於國。不關在民。三也。吾聞古之司農。稱爲計相。守令報最。亦曰上計。然則一群之財。消息盈虛。皆爲計事。此計學之名所由立也。

篇一

論商宗計學之失

自泉幣之用有二端。既爲交易之易中。又爲貴賤之程準。於是人狃於所習。而非泉幣不足名財。非金銀不足名富之意起矣。自其爲貿易之中也。故以金錢易物。其便倍蓰於物之自相易。慮無財耳。有財斯有物矣。自其爲貴賤之準也。故凡物易量之大小。皆以金錢稱。富者以其金多。貧者爲其錢少。人纖嚮求富者。謂之重錢。慷慨好施與者。謂之錢輕。富也多貲也。雄於財也。自常語云之。皆指金銀錢鈔之多而已。初未嘗有別異也。

其言國之貧富也。與稱家之貧富同。國何以富。多金之謂也。其所謂富國之策者。謀所以充實府庫。含積銀累金而外。無他道矣。往者美洲始通。西班牙人至一新岸。則必問其地及鄰金銀多寡。其所以殷殷探此者。意謂假使二者無多。即非樂土。無足顧味。必黃白饒衍。乃可占居或攻取耳。吾聞蒙古成吉思可汗至歐東日。神甫喀比諾爲法蘭西王使其軍。軍中人輒問法國牛羊幾許。此其間旨。與西班牙所問正同。大抵以貧富定攻否耳。蒙古不知泉幣。而以牛羊爲易中。故問牛羊。西班牙用泉幣。

故問金銀也。假必以所問者定國貧富。則成吉思之言差近真也。

英之洛克者。理家巨擘也。顧其論泉幣。則云食貨爲物。銷耗隨時。故其富不可以久。賴國而僅僅饒此。則雖無出口外流之事。今茲至足。來許可以綦貧。至於泉幣。其爲物實時不渝。但有周流而無耗蝕。假令以術馭之。令無出國。雖永遠利賴可也。如洛克言。則金銀乃一國食貨中最爲悠久堅固者。彼謂計學之書。理財之政。皆當以厚積金銀爲第一義者。宜已。

或又謂國所以務積金銀者。以有與通之故。今假一國獨立世間而無鄰敵。抑雖有鄰敵不相往來。則泉幣多寡。無關強弱。蓋泉幣之用。在於爲價通貨。多則名多。寡則名寡。而於富厚貧劣之實。視國中衣食之豐儉者。固無間也。獨至有所與通。鄰敵相望。兵爭之端。隨時而起。陸軍海旅。長行遠征。則無金銀軍興乃乏。是以如是之國。當其閒暇。必以多積金銀爲主謀。庶外憂之起。有以待之。不至困殆。其論如此。

自時俗之論如此。理家之言如彼。於是歐洲諸國主政柄者。群然以使國多金爲要。

國雖得效蓋寡。要皆盡心力窮國勢而爲之。西班牙波陀噶爾奄字內極駛之礦而歐洲金銀之窟穴也。乃設重刑以嚴開出之禁。征厚稅以塞外輸之門。於是尤而效之。靡國蔑爾。若英若法先皆行之。甚至若吾蘇之貧國而考其議院憲令亦懸策金出國之條。其出人意表如此。蘇而如是則餘國可類推已。

### 案英國金銀出口之禁至察理第一而除

繼而各國通商日宏。而金銀出口之禁遂爲商民之大梗。蓋商法三而國中之貿易無喻已。至於中外貿易或境外貿易皆以見錢交易。於彼此最爲利便輕簡者。自禁令設則必出於以貨易貨之一途。而虧損滋甚。於是各國經商之民始群起而與此禁爲難矣。其議曰。夫國家所以禁金銀出口者。恐國寶之日以見少故也。願今用金銀而以之置貨通商於外。則轉移之頃將不見少而見多。何名而禁之乎。蓋但使國中之於外貨無或加銷。則此貨勢必復出。貨復出矣。財復而贏利增。國中之見財不因是而加多乎。蒙氏曰。通商之出錢猶耕者之播種也。播一囊之嘉穀。不資之倉。



庚之中而棄之泥塗之上使但見其爲此而不從其後而觀之則方春之農皆不惠而喪心者矣設國家緣此而懸播棄穀食之禁山野之民皆將笑之而吾未見禁金銀出國者之賢於前令也又議曰國家欲金銀之不出口禁無益也夫金銀爲物值鉅而易挾值鉅則利重而民輕犯禁易挾則漏多而姦難以察欲塞金銀之出國者道在審進出之差進出差者總進出口之貨相抵之餘數也使出口貨多而進口貨少則進出差爲正而在我收價於外而後平而我之金銀增矣反是則進出差爲負而在人出價以償而後平而我之金銀減矣進出差既爲負而在人雖欲勿償不可得也當是而適有金銀出國之禁勢不足以止金銀之勿行徒以令故使其事之轉危而所償之益費耳蓋禁設而金銀之出口難難故兌者之保險加保險加故兌轉起金銀之在內者賤在外者貴兌價既起差數轉滋是禁其出國而出國之金銀乃轉多也今設英與荷蘭通而進出差爲負而在彼銀由英兌荷者逢百加五英市不五翁斯之銀以之入荷僅作百翁斯計是在英百五者在荷作百得貨如之而在荷

百者在英作百五得貨亦如之如此則英貨入荷降賤者百五而荷貨入英翔貴者亦百五各如其兌價之差故二國兌銀由荷入英之所減將適若由英入荷者之所增而進出之差既爲負而在人我之所償負者亦百五加多而見財之外出者愈益鉅。

當是時群議以禁金銀出國爲不然者如此自我觀之則其論之篤謬亦參半也如其謂出金銀以通商國實不必見少且將加多此篤論也又其謂使金銀出國而利從之則雖有禁不止亦篤論也獨其謂欲塞金銀出國之流在當國者審出進之差而爲之所此謬說也蓋金銀者百貨之一端百貨之盈虛當國者未嘗加意也任交易之自然則常各足何獨至金銀而不然乎卽其謂兌價外長將使出進之負差益鉅而金銀之外出者彌多亦謬說耳夫謂兌價外長則商之償通負於彼者數溢於未長之前是固然也顧其所溢爲之兌者受之卽以犯禁私爲之故其費以滋而其費實用於本國不必比之未禁未長之前多所開出明矣賄囑之行私偷漏之冒險

其所費者皆未出國而散之。至於出國則未有角尖之微。溢於原數者矣。且兌價既外長矣。商者惜費。將自劑其出進之數。使之差均。而兌價外長。其理如加征。則外來之物價必比例而翔貴。價貴則銷狹。凡此皆所以減進出之負差。而金銀之出國者自少。何緣而云益鉅乎。

其說之不能無頗謬如此。顧時人則深韙而從之矣。蓋當時議者諸商。而聽我裁擇之者。則議院也。樞府也。爵紳世家也。議者自謂洞悉商情者也。聽其議者自謂於商業無所知者也。夫通商之可以富國。視已成事。夫人而喻之。獨所以富之理。雖商者不必深喻。商之所知者。在務富其家。至於富國。彼實未嘗措意也。法令有所梗。則群議上言。請變置。亦時取通商之便利言之。明舊法之所以抑遏利源。致生理不得發舒之故。如前謂通商可致金銀。其不得宏長暢流者。坐禁出之令之爲梗。一倡萬和。前令卒廢。當是時。英法二邦。禁不得開出者。止於造成之制幣。其在錠未範之金銀。與外國之泉幣。則不禁也。至於荷蘭。雖制幣亦縱出入。而國家所斤斤致謹者。從此

乃在進出之差。然而禁金銀出國無益矣。卽讓進出之差者。猶之無益也。而其事愈煩。其效愈渺。有蒙氏者著書號英國富源。多言通商之利。其中持說堅義。不獨英之政府放而行之。卽歐洲諸邦言商政者。實皆取法於此。其書重外商而不主國中貿易。獨不知國中貿易乃商法之最要者。蓋用其同而利盡國中。所鼓之民功最衆。故也。而其書乃輕視之。以爲次於中外貿易者。彼以爲國中貿易於封內金銀之數。卽無所損。亦無所增。故無關於國之貧富。但使其業之衰盛。不至牽率國外通商之局者。雖置之不論不議可耳。

案國中貿易利國過於內外貿易。其理已於前篇發之。法國計學家先明此義。斯密氏言此。夫有所受之矣。

國無礦。不自出金銀。抑雖出而不足於用。則必待外至無疑也。此如國中無葡萄田。不自作酒。則飲者必他國之所供。事正等耳。顧未聞以國之不產葡萄。主計者必競於酒醴之出入。而後民足於醑。則何爲以國之無礦。主計者必致謹於進出之差。

而後黃白乃足用乎。此亦說之不可通者矣。國有致酒之資。欲飲者酒自至。國有致金銀之產。需金銀者金銀自來也。凡物非已產者。皆見價而後來。爲百貨之價者。固金銀也。而爲金銀之價者。則百貨也。任供求之自己。不煩主計者之神慮。而吾國之酒。自足用。則吾亦將任供求之自己。不煩主計者之神慮。而知吾國之金銀。必足用也。夫金銀不至其國者。亦有之矣。不能具百貨之價。以爲易。與其物已饒衍。更至乃無所用。如是者。乃真不至。夫如是而不至者。雖主計者日握算持籌。豈能使必至哉。

國中諸食貨。大抵皆視求以爲供。一物之至其市也。總其產與輸之費。合租庸息三者。以爲價。求者之力。足以及之。雖在絕遠。集其市矣。此供求相劑之理也。且供求之相劑。物莫易於金銀。蓋其物值鉅而易換。貨之最便轉輸者也。由甲之賤。趨乙之貴。由丙之多。趨丁之寡。風馳水注。不啻也。今設吾英欲得黃金。而力足以致。則由力斯彭抑他產金。所以至倫敦。運五十噸之金。以造五百萬幾尼者。一舟之載足矣。又使

所求者爲穀麥其值同前穀價噸五幾尼則資百萬噸之噸載或千噸之船千艘而後集事此用今日全英之船數一英之船數至光緒六年七百萬噸有餘一而猶不足也轉輸難易之例如此而供求相劑難易之例亦如此矣

使國中金銀之積已爲過求之供則雖峻法嚴刑不能禁其物之無出國西班牙波陀噶爾已用之矣而金銀之外流自若秘魯巴西船日月至充物都市二品之價賤於鄰封此如水然高下既殊欲其不趨於平不得也由是亦知使國之金銀求過於供而二品之價日貴於鄰國則其物之至亦無待法令爲之招也且令禁其勿來勢亦不可得耳試觀希臘舊史言斯巴丹饒食栗沙穀斯當國禁金銀入境而四遠磨至令卒不行可以證矣至於近世英荷皆有大東公司荷公司所運茶葉比英公司以銀論茶之占位過銀百倍以金論其占位過者二千倍有餘其偷漏關入難易比例可見今茶尙以微利而漏之況金銀乎彼以禁令爲可恃者特不思耳

而金銀之價其升降常舒無驟騰驟跌之弊者實亦賴易挾利轉之故百貨占位太半多龐大輪囷流轉不易則市邑盈虛之難劑如之其奇貴甚賤之事爲金銀之所無金銀之騰跌也常緩常漸常均人謂歐洲近二百年來以西印度諸礦之開金銀之價常跌而不起此其實然與否難以決知所可知者金銀貴賤之差至使百貨之價高下顯殊則必如新得美洲時而後有此耳

案近十餘年間東亞金銀貴賤之變實爲亘古所未有以金爲準則銀之降賤殆倍於十稔以前而銅之貴則古二而今三此其故粗而言之銀礦所出日多一也東西諸邦悉棄銀而用金準二也中國立於其中無力改作遂爲天下之下流國中物價今昔絕異此其世變豈異美洲新得時耶

夫然自知計者觀之任商業之自然其國中之金銀必不至於不足就令不足而食貨既饒之後其事亦不必遽病國也蓋使物材不足則施巧成器者無以爲致力之資而工始病矣使嘉穀隱膳不足則養生者儉而民阻飢矣獨至金銀泉幣之不足

民尚交易之可爲。雖甚不便。猶未若前害之烈也。且猶有質劑契約之代行。而楮幣果善爲之。且便或逾於三品。故舉輕重緩急之情而統籌之。彼爲國家者。以金銀之多寡爲一大事。惻惻然惟恐其積之不增者。其用心真無當也。

夫一國金銀泉幣之不患寡如此。而閭閻之嘆嗟。非里之咨嗟。其惡弊常至於吾耳者。莫若錢少之衆。何也。曰。此非錢少也。求錢而力中求者少也。夫錢如酒然。沽之既無貲。買之莫能得。則長渴飲而已矣。使有貲足以沽。其信可以買。求則得之。未嘗欲飲而歎良醞之難遇也。錢之爲物。何以異此。或又曰。患錢少者。常不止於一二人之嗟不節者已也。有時徧一市一鄉而皆云爾者。則又何居。曰。此廢著治生而過其力之通弊也。豪奢之子。不量歲入而爲出。逐利之夫。數倍母財以置貨。則終之其貲不足以易錢。其信不足以舉資。弊亦等耳。爲貴庾以規厚利。則未至而積財蕩然。其然諸亦不爲國人所任信。則徧走國中以求稱貸。而人皆告以無財。雖然。此不足以云國之泉幣少也。泉幣之多寡。自若。彼欲之者。無術焉。易而得之。蓋商之通塞有時。方



其通而贏率優也。則自駟商至於行賈。皆犯過實之愆。以邀一時之利。彼非斥真財以治之也。大抵署諸執契爲之。籠甚多之貨。以致之遠方。冀幸期之未熟。而數倍之利已坐得矣。事反所期。而賁通者總至。索見財則已亡。欲舉資則無以爲質。其財之少也。其得之難也。故吾人遊一閭之市。而聞財涸錢乏之云。遂指爲國中金銀之不足於用者。其違事實遠矣。

必曲譬巧辨。夫金銀泉幣之非財。而在金銀泉幣之所易而得者。以有所易。其用乃珍。雖其理固然。而必爲時俗之所笑。夫泉幣固財也。國之積聚。必有金銀。顧其物必居其少分。而爲其不生不息之一端。此在前部固已深明其難矣。國之財產。有貨有泉。貿易之家。常若泉之轉貨易。而貨之轉泉難者。非必泉之爲財切於貨也。是有故焉。泉者交易之通器。隨時可轉。遇物能售。故以貨得泉者。由拘而通。由泉成貨者。由通而拘。其故一也。貨常易毀。泉則不腐。故藏貨者多耗虧。而積泉者少闕損。其故二也。貨之未售也。索通多則無以應。既轉爲泉。肆應有餘。不受迫促。其故三也。凡利之

始則出泉以置貨。必復轉泉。乃見贏利。故以泉轉貨。勢常緩。以貨轉泉。情恆嚴。其故四也。統此四者。由是先泉後貨之見日深。常以貨爲塗術。以泉爲歸宿。得貨所以求泉。而非多泉不足稱富者。人同此情矣。雖然。計一國之利者。與言一家之財異。故商賈屯貨雖多。而轉不以時。則其業可以饒。而國不富是也。請賈之財。必比貨而後爲母。貨必轉泉而後餘利。而一國之貨。不必皆轉爲泉也。其歲殖出以外售者。常少。留以內銷者。常多。且外售者。必出其所有餘。而所易者。又常爲外貨。取給民用。不必皆轉爲金銀泉幣。逐利資也。故國之歲殖。雖貨不轉泉。未嘗病國。至通財輪穀。坐以見少而不便事者。則有之矣。然尙有他物焉。可以承其乏而周於用也。民每歲用循環之母財等者。則其歲殖亦等。有歲殖斯有金銀矣。且由暫而言。則泉之轉貨。易於貨之轉泉也。以久道言。則貨不轉泉。其用自存。泉不轉貨。其用斯廢。故泉常求貨。而貨不必常求泉也。民之得貨。將以用享者。不必復售也。而其得泉也。其終必以求貨。泉得貨。可以爲終事。貨轉泉。不可以爲終事也。民之求泉。志不在泉。得泉而貨從之。則

志在貨也。

時俗之言曰。衣食百貨。年月輒毀。去而不留之物也。金銀者。物產之精。貫時無變。使國無漏卮。而常積累。數世之後。國之富厚。豈可量哉。故出不變之寶。易易毀之物。國之失計。莫過此者。此其所以貴金銀而賤百貨者。以其物之耐久故也。而吾所不解者。則英出鐵器。以易法之酒醪。而若人又不以爲失。何耶。錢之耐久。亞於金銀。何不云使其物常無出國。則累世之積。鼎鑄之富。豈可量哉。假使吾爲此言。彼將曰。國之需鼎鑄也。其數有限。徒富其物。過於國中烹飪之所資者。是謂大愚。經經者何足寶乎。果一旦飲食之事加多。鼎鑄之用。將不期而自足。不至羹飢繁而釜罄寡也。當其有用。輟其實。以具其器者。有之矣。虞其工以治其業者。有之矣。何虞其乏於用哉。此其言是也。顧奈何以鐵言則明。以金言則惑乎。國之需金銀。其數亦有限也。鐵所以爲鼎鑄。而金銀所以爲圖法。若格棧疆飾之事。圖法之限。限於國貨之待轉。格棧疆飾之限。限於有力而好麗者之家。使國貨之待轉者多。則貨以易金。而圖法自給。使

有力而好麗之民數進則黃白雖在荒遠將梯航而自錄也亦何虞其乏於用乎吾未見積無用之金銀泉幣楮幣驅飾者其智優於聚無用之鼎鑪也且無用之物非能徒積也積鼎鑪而無用者必損飲食之費則積金銀而無用者亦必損國民之衣食燕樂之奉而爲之泉幣楮幣驅飾者猶之器也與鼎鑪之爲用蓋無殊方其有用則其數自增方其無用而強多之則其用亡而其數日轉減其爲物之易挾如此而停積之虧損甚鉅故不視用爲積而使之過多者雖有峻法厲禁不能止其勿出國也

卽如國有隣敵師旅遠行亦不必積有金銀而後軍興不乏也蓋養海軍陸旅者糧食而非金銀使其國農工商三業既隆有以與遠方之食貨爲易則雖無金銀可以伐國吾嘗求之國有遠征之師所以餉其軍者有三道焉致其國所前積之金銀一也致其國工業所成之熟貨二也轉其國農功所登之生貨三也而國中所積之金銀亦可區爲三物其泉幣通寶一也其民之盤盂器皿二也其國君府庫之所積儲

三也。

然欲於一國泉幣之中求其有餘以爲遠餉則其勢常難蓋泉幣之流視國中待轉貨資之多寡待轉者富則泉幣多待轉者微則泉幣寡常有其限無大餘也有所不足則其物自增有所過多則自然外溢有莫之爲而自劑者焉至於國有兵事而師旅遠行國之見財挾與俱去然而遠行者衆居者減則轉者亦微其國幣之數亦可以降寡且兵事既起楮幣常興若吾英之司農鈔海軍鈔英倫版克鈔大抵皆起於此時以代真財之用而真財之外徙者益多雖然此非無盡不竭之源也使其費甚奢則測可翹足而待也

至於鎔鑄私家金銀器皿以益軍國之需則其勢尤有限輒近法國用兵（此係七年之戰始於乾隆二十一年英法爭北美剛那達地普與英合奧與法合兵連七年法失北美而得鹿林新叶加）當國者嘗用此術以籌餉其所得至微而案几蕭然國呈陋象論者謂其得不償失也更有國王私庫之儲其在古時常爲鉅款至於近

世王者私積之風漸衰。聞者獨普魯士國王而已。英國本稊中所有疆外之兵事。軍興之費較之前史所載實覺其奢。然其餉軍之金銀。既不出於國中之泉幣。不出於私家之重器。亦不出於王府之積儲。英法之戰。計費英用金錢九千萬鎊。其中新舉國債已七千五百萬矣。而又有所加什一之田賦。及移緩就急所借用之沈債帑項。一沈債帑項。乃國債還利之盈餘。積之所以漸溲。其債舊者。其法立於英威里布勒。說見部戊。一統此之費。其三之二。皆用於外邦者。若日耳曼。若波陀。噶爾。若美利堅。若地中海旁近國。若東西印度。皆銷耗此財地也。英之國主。不積私費。而銷鎔私家雜器。吾國亦所未聞。當是時英國通寶。蓋不過一千八百萬鎊。自重脩國法。復鑄金錢以來。或以謂遠過其數。其誕者乃云三千萬云。一英國幣當一千八百五十六年總計七千五百萬鎊。一此其數之實否不具論。第由此言之。假本稊戰事之費。資於吾英之見財。則不出六七年之中。所用之金銀。必再出再反而後可。則知金銀爲物。去而自復。人且不知。而吾謂主計者之於泉幣。一切持滿戒漏之政。爲無補之

勞心理益明白不待更辨矣。何則。前者數千萬之金錢。再出再入。而吾民固未嘗覺也。且當此六七年中。軍興之費。繁浩如彼。都市間亦未聞有言制幣特乏者。具貨轉泉。其得之之易。一如平日。獨是戰事殷而懋遷之利資暫厚。由此而競於商業者多。不列顛各口需財廢著之家。往往過於其力之所堪任。而錢少難得之歎。乃隨地聞矣。無見貨以爲易。然諸不見任於人。資者既艱於借費。貸者常難於索通。遂群然以謂金銀之見少。豈真金銀之少哉。其具實力以與金銀爲易之人少也。

總之。近者七年之戰。其爲費之不訾如此。其由英而輦致外國者。決非全用金銀泉幣之見財。而必多運國中所產之貨物。戰部之致金於遠方也。大抵發商領兌。商則受金出吡勒。遠人以吡勒取金於其地之某商。而商與商之相接也。或前有交易貨物之事。或兌金之後。而以貨作抵。故其真由英而至遠所者。皆貨而非金銀也。就令英產之貨。非彼所之所行銷。亦不過爲事較紆。以其貨先行於他國。由他國易利銷之貨。以致戰所。則多一吡勒而已。又不必致見財也。蓋致利銷之貨。則一轉移而贏。

利從之。徒運金銀有致寇之危而失經商之利。智民所不爲也。且出見財以求貨遠方者。其利之生。不生於購貨之時。而生於售貨之後。若運金銀以償前兌之所負。既鮮回貨。利烏從生。故商者之代官領兌也。必逆知有可轉之貨而後爲之。而當戰事殷起之時。往往貨出無所回者。蓋其價於兌金時先受久矣。時人且不知而訝之也。前謂國中所積金銀。區爲三物。然三物之外。尙有周流於各商國之中。而爲之公幣者。則在鋌之金銀是已。其爲物也。通於諸商國之中。猶制幣之通於一國。制幣之多寡流趨。視封內百貨之情以爲轉。二鋌之多寡流趨。視各國地產之情以爲轉。二者皆以便懋遷。幣用於民與民。而鋌用於國與國。故鋌者。各國之公幣也。本祺之戰事。其用鋌也必多。當群雄並爭之時。用鋌之情。其多寡流趨。與安平之日固有異。而轉而趨於戰地者必多。其爲芻粟衣糧之資所故而易者。在當衝之國矣。顧吾英每歲之所餉軍者。無間爲鋌之多寡。必以英之歲殖民而得之。故極而求之。英之所以能轉戰累年。而不爲戰所困者。終在國中之歲殖。其地力人功之登成者矣。師興歲費。



至爲浩繁。國之歲殖能濟此而不匱者。必至盛旺而後能。試舉一千七百六十一年之一稔計之。是年軍費。糜者蓋一千九百萬鎊。此決非私積區區者之所能濟也。卽令國有最腴之金礦。其勢亦將不堪。西班牙波陀嗎爾二國。由美運進之金銀。當至盛之年。不逾六百萬鎊之數。此軍中四閱月之費也。他可知矣。

當戰之頃。貨之便於行遠。易以餉軍者。莫如精緻之熟貨。以其物值多易挾而運費輕也。國產是貨多者。則其從事遠略也輕。每有兵事不解。歷時甚長。爲費甚廣。而國之見財不以見少。顧其貨常出而無所復有者。獨諸商之貨。非以資軍者也。國之餉軍。多由商兌。而商則以貨償所兌者。故其時工業最旺。其動奮亦倍平時。蓋治貨行遠。以償軍需。一也。治貨爲易。乃致他產銷於國中。如平時相通之爲。二也。故每有兵戰。其勞師空國已極。而工業事勤利厚。或過平時兵事既解。反嗟衰歇。其利若與國異道。國病而業休。國休而業病。觀於七年之戰。英國工業衰盛之情。將於吾言曉然。不待多所取證也。

案觀此可知近世兵事與古殊矣。中國戰事常在九有之中。喪亂薦臻。殘民毀物。而軍興之費。加賦乃給。故有壯者盡於軍旅。老弱困於轉輸之言。蓋生民之災。未有大於兵燹者也。至近世各國戰爭。往往起於國外。以他人之國爲戰場。若印度若土耳其若西班牙若南非洲盡如此矣。而軍旅之費。又資應之。故兵事方殷。而國民不知所苦。且豈徒不知所苦而已。市廣利優。猝致雄富。者所在有之。如往者南北美之戰。工商諸業。振振闐闐。故其時人以謂國雖殘而民則利。推原其故。蓋師徒雲集。所需食貨。必倍平時。求者既多。供者自富。而邱山之費。倉卒求給。皆舉國債爲之。戰在境外。自無累民之事。究之兵費必有所出。而出者終當在民。是以禍難既平。師徒分散。不獨都市蕭寥。而賦稅常亦加重。此國病業休。國休業病之象所由來也。假使師征之費。當桴鼓方鳴之日。卽出於閭閻加賦之中。則農工商無一時之利。其休病之勢。與國乃同。而必無國殘民利之謬論矣。

用兵遠外。而徒恃國之生貨以餉軍者。其勢必不可以久支。非曰生貨之無所易也。

果其運致固亦可以濟兵食繼軍需特生貨多輪困而運費煩浩耳生貨者農之所產每歲之殖常視民數之多寡爲之而其物又不可以驟擴使致於遠者忽然而多則止以贍其民者必忽然而不足惟工成熟貨可以免此民之所取給者常用其輦而出者皆其業之所有餘也吾友休蒙大闢之論史事也嘗言之矣曰英先王經營遠方所不能久暴師於外而常中止者其軍需兵食之所出皆作於農產與夫工業之劣粗者農產國中所必資不能多分以遠致也而工業之劣粗者其運費甚奢而所以及軍者儉故武功之不揚而遠略之不竟者其故不坐於無財坐工業稍者未興故耳當彼之時國法已立其以泉幣爲易如今而其泉幣之多少必與國中懋遷之繁簡爲比例者與今日之情無以異也且其比例之率必於今爲鉅者以楮幣未行也夫國之通商無聞而工制蹇淺者遇有大事其君欲歛鉅貲於民其勢必不可以猝辦也故如是之國其君莫不有聚歛之行不如此無以備非常濟大役也矧治之未隆貪主多而廉君少歟據土分民之世國主之仰財也所以爲一己之奉者寡

而所以爲群賤之養者多。然而養群賤者。量入以爲出。其勢常處於有餘。奉一己者。私欲無涯。其勢常鄰於不足。曷嘗觀於韃靼之酋長大人乎。百十爲曹。莫不有藏。齊甌車之私畜。烏庫連。戈利克。種人之長。曰麻哲巴者。瑞典名王察理第十二之同盟也。一麻哲巴者。戈利克舊族。孤兒順治元年生於波蘭之卜多利亞。長入波蘭王宮。爲侍衛。與王妃通事。覺縛麻哲巴於野馬之背。將磔之。而馬逸。負麻哲巴入烏庫連。山林中。遇種人。脫其繫。立之爲酋。康熙二十六年。俄皇大彼得立之爲烏庫連貝子。絕愛重之。願麻哲巴欲自立。不附。大彼得得則陰與波蘭之思但尼斯拉泊。瑞典王察理爲聯約。拒俄人。圖麻哲巴於巴圖林。敗走瑞典。從察理與俄戰於布魯圖哇。復走瑞典之賓特爾。康熙四十八年。發憤仰藥死。一其私府之積。號甲東歐。仰而溯之。則法之墨露文種王。一唐天寶已前王法。一英之撒遜種王。泊諾曼種王之前數代。大抵皆當積聚。當是時。無間篡竊與傳繼。其嗣王皆以奄有前人府庫。爲立業克固之始基。自工商業昌。文明肇啓。而邦君乃不以斂富爲要義。蓋卽有大事。取財於民。

一謂書院自  
無難。而其事可廢也。且輒近世主其求財之用意。又與古殊。民生優樂。古者樸樸之風。降微官府之費。日益華奢。其勢不惟爲積之不能。且日形其不足。輟設險治兵之資。以從事於苑囿居養之樂者。有之矣。望者德師。果遠遊波斯。而著論曰。吾見其國之麗都。而不見其強果也。吾見其民之多奴隸。而罕聞其勝兵也。此以云今歐洲數國之形。殆近之矣。

案所言當以貨之精粗爲判。不當以農工之產爲分也。在作者之意。固亦言其大凡。然有漏義。農之所產。固有貴重之物。而礦產金銀。又無論已。道咸間英人犯華。鴉片乃餉軍之大宗。不可謂鴉片非農產類也。英國當元明間。羊毛爲出口重貨。義都活第三特之以與法播。他若美之棉花。蔴葉。乃所用抵軍興國債者。而吾國之茶絲羊毛。在國家皆爲要貨。他日所以消償國債者。此其大物也。而主特度支大臣。與外省之疆吏。茶聽其雜。蠶聽其疫。毫末不加人力。一任於天事之自爲。此則重可歎惋者矣。

故國有通商而徒以歛進金銀者則通商之利亦隘矣。夫曰通商以歛進金銀爲利者其說已非。曰通商專爲歛進金銀而起者其說尤悖。然則二國通商其利果安在乎。曰大利有三。一曰出有餘。一曰濟不足。夫一國地力民功之所產而至於有餘者物雖供而莫之求也。故有餘則無利。通商者致有餘之產於方求之國而鬻其最貴也。物有其不足者有求而莫之供也。故不足則生鬱而事或不周。通商者致他所易供之貨以濟吾土所不足而買其最廉也。是故一交易之間而利並起。通商之行於國與國猶市易之行於民與民其理豈二致哉。昔者以銷場之隘而分功之局雖有而未周也。自通商行而分功之微至精專各臻其極而爲之乃愈疾矣。且有餘者皆有所銷而貨不至於壅滯。生者得此之勸功而愈衆。由是而歲殖增亦由是而國財廣溢其源而暢其流而財之生乃以無量。通商之實利如此。此凡通之國所公享者而大利則在經商者之所居。何則。此出有餘濟不足之事。彼之神慮用於本國者深而施於異國者淺故也。至於歛進金銀之爲使其國無礦通商之興固足以致之。然

其利乃所旁收而非正業。方之前二，至不足道。使通商專爲金銀而設，一稊百稊之中，所載者雖不滿一船可也。

人皆知亞美利加通而歐羅巴富矣。然美所以富歐者，非金銀也。美誠多金銀之礦而特肥，顧其礦之多且肥者，其大效不過使吾洲二金之日賤。設以穀爲之程，則握粟以易盤盂，今之所費者，僅得十五稊中所費者，參之一已耳。吾歐民終歲之勤動如初，其所得之金銀，乃三倍於古昔。夫一貨之價，使其降賤也，參前之一，則不獨有力者之取是，將三倍於其初，而力足中求之家，亦將緣其賤而益衆，則其數雖十倍二十倍於前可也。故令通商之事從同，歐洲金銀器皿之多，以美礦故，亦二十倍三十倍於無礦之日。然則美礦之便於歐民，誠無疑。然其便至於如是而止，而亦有不便生其中焉。何則？以金銀之降賤，於易中之德有損故也。所購之物均，而所攜之金加重，往之一古洛而可者，乃今一先令而後得之。此之不便與前之便者皆微，而進退略相抵。故金銀二者出礦之少多，於歐洲之民生，不能有大變異也。雖然，謂美洲

之礦產無關於歐洲之世變可謂美洲之開通無關於歐之世變不可蓋美之新通爲歐產開無窮之銷市由是而分功宏亦由是而民力奮收益疾益巧之效於不自知向使美洲不通則歐市廣狹長此終古而有餘之貨無所銷施生業如故而民氣不新其效不僅民之不富已也惟巧疾並臻故各國之物產皆進斯其民實富各力裕而氣舒當是之時不獨歐貨之於美民爲所新見也即美產之入歐市亦皆創獲也開亘古未通之商局其事固當爲彼此交益之新機不幸貪人敗類吾歐民之屢其地者恣其強暴擄奪之凶威而美之種人始告病已

自亞美利加之通而歐洲之商場廣而自得非洲好望角海船東繞以抵印度而歐洲之商場尤廣一歐人航海尋通新地莫盛於前明成化宏治之間而大抵皆波陀噶爾西班牙二國之民而波陀噶爾爲尤著其山歐洲航海通中國者亦波陀噶爾最先此中國人所以獨稱其國爲大西洋而澳門爲最舊之租界也蓋其時波西與義大里諸國天算獨精善揆測經緯而海國之民又擅駕舟之技故也如美之通則



始於科倫波科本籍奴亞民仕於波陀噶爾者常謂欲通印度不必繞非洲南極地  
既員體但西向長駛自能終達以其策于英法政府求其資助皆不應久之西班牙  
后伊薩自信其術脫簪珥重寶資以三船於宏治五年立秋前六日西駛其年寒露  
後三日抵墨西哥灣之海梯島則自以爲已達東球此西印度之名所由昉也又印  
度通歐之海道則始於波陀噶爾海將名花思戈者先是波陀噶爾人已得好望角  
至宏治十年花思戈駕船東繞閱十數月而抵印度西偏之噶里谷蓋其事方之科  
倫波爲尤難至正德三年阿布葛呔爲彼駐印大臣而馬刺甲爲所并阿布葛呔爲  
其王所遣者刺死舟中繼其位者本其遺策而求通中國及日本嘉靖隆慶間波陀  
噶爾入粵之澳門云一蓋美多草昧之國其治化略有可言者獨墨西哥秘魯二國  
而已自西班牙入至而二者皆殘而不可復而若痕都斯垣若支那若日本若支那  
已南各國大抵皆數千年建國雖其中無肥礦若秘魯墨西哥者而其民之富樂其  
野之開治制作工商之業皆非二國所可幾自古化國通商其相易之物必多其所

收之利必大過於淺化者。顧自海通以來。遠東之利益。若轉不遑所收於亞美利加者。則其利有或過之者矣。波陸噶爾人。專斷印度商利者。殆百餘年。餘國之貨之去來。大抵皆波陸噶爾人爲之。中會前。租初。載荷蘭諸商欲分其利。則創爲大東公司以統之。繼而英法瑞典丹馬諸國皆有公司之立。利出一門。而非大通之交易。而美洲商業。則盡人可爲。不受公司之牽制。收利微鉅。此其由矣。夫大東諸公司所獨享之利權。其獨蒙外國王官之保護。由此而致不訾之財。實爲未沾其利者之所深嫉。以其歲輸遠東之銀無算。遂僉言其業有害於國家。乞禁止。於是公司應之曰。公司之致貨東方。誠非以銀不可。銀之注於東方者實多。然自通商公司之立。每歲各國收利皆優於初。然則公司所爲。或有損於歐州之全局。而於各公司本國皆固莫大之利源也。其語之不通如此。蓋請禁之家與公司之人。皆徂於時俗之見。以銀多爲利國。銀日流於東方。統其效之見於歐洲者。盤孟或以稍貴。而制幣之用不至過輕。前爲微害。後爲小利。要之二者於國計皆不足道也。自遠東既通。百貨暢

流歐洲各國之富固宜大加而其利不過如今日之所收者則國家沮勸之政非也夫民生言語之間以財與錢爲同物久矣名同而其物實不同此設辭之所由生世俗之見所由錮且習之既久欲區以別其勞誠難或深知俗說之非矣而言論爭辨之頃有不自知而謬迷者言計之士皆以務聚斂謹漏卮二者爲不易之財政國無金銀之礦則必務聚斂必謹漏卮必審於進出之差使鄰貨之來必劣於已貨之出而後已則爲之政令焉塞外國之進貨獎本國之外輸以斯二者爲理財之大經蓋商宗計學之家能違之者寡矣

其塞外國進貨之政二一凡外國之貨來銷國中而與本國之貨爭銷者不問何國皆沮抑之使勿暢流二凡與其國通商而進出差爲負者不問何貨皆沮抑之使漸相抵而其所以沮抑之爲又不出於二術征以重稅一也閉關勿納二也其獎本國外輸之政四還稅一也予獎二也立專約三也開藩屬四也其爲還稅者二本國之貨征抽已納至於出口則掣其所已征者之全若半以還商者又外國之

貨乃入國而征之。及其更出。則掣其所已征之全若半。以還商者。其爲予獎亦二熟。貨之製造方始。利入不宏。而主計者以爲利國。則獎之。又他舊業之所登。必外輸多。而後國利者。則亦獎之。其立專約者。與所通之國爲專條。利過於餘國所沾享者。若弛關。若減權。皆此類矣。其開藩屬者。遠方步口。爲一國所特開。若航海所尋得。或兵力所侵取。則其國之民。凡貨與商。皆享事權之專利。抑使其利優於餘國之商。

此其所以塞外國進貨之政二。而所以獎本國外輸之政四。統此六術。皆以謹漏卮。而使進出之差常爲正。而在己之道也。蓋以謂進出之差正。則漏卮塞。漏卮塞。則國之金銀不可勝用。國之金銀不可勝用。則富國之道盡矣。此其策之爲長爲短。爲巧爲拙。余將各以一篇言之。姑不言其聚散金銀之多寡。但計其效於一國歲殖之何若。蓋國之富貧。民之苦樂。必視歲殖之盈歛。使歲殖降多。而國不富。民不樂者。蓋未之有。歲殖世減。則雖廣積重資。吾未見其物之可長保也。

篇二

論沮抑外貨不使爭銷之政

自國家於外來爭銷之產立關禁而加重征。而本國致登此產之民遂獨專其市利矣。今如禁生口鹽肉之入國。則脰膳屠肉之利。牧者專之。歲遇中穰。入口粟麥之征。禁重。其效幾與禁入者等。則穀食之利。農者專之。其他如禁外國氈罽之入。則羽毛之業壟斷焉。吾英絲織之業。向取其材於外者也。而近者亦許其專利。麻枲之業。尙未有此。則方出大力以求之。下此欲禁外來而盡市利者。國中之業方多。而國家或爲之立禁。或爲之加征。凡以助民興業之意也。此非稔於關征之故者。有欲舉其貨物之名而不能盡者矣。

夫謂專利之業。國財民力常勸趨之。此誠無疑。獨商政如是。國民之業將皆盛大與否。而國家輔相民力。當因任自然。使趨於最宜之業乎。抑不本自然。矯以人力。使畸重輕之爲愈乎。則其理稍微。非常算所能盡矣。

理之最明。莫若民功視母財爲廣狹。蓋功必有所養。故言一國之民功。計母財可以

得其概。未有能過所養以爲多者。一人發業。其中所用之備。指必以其母之少多爲比例。則一群一國之中。率作興事。勞民之數。亦以其全母爲比例。而無從獨多明矣。是故爲國理財。其中生者之衆寡。非政令沮勸之所能爲也。開其爲此。閉其爲彼。則政令沮勸之所能爲也。雖然。所開者未必利。而閉者未必害也。則莫若任民之自趨。今夫廢著鬻財。無間商工之業。必竭力盡慮。以出最利之塗。以爲最勝之業者。有誠莫不同也。方其爲是。意非以爲群也。取適己事而已矣。然惟各適己事。而群之事大利。各遂其私。而公利存焉。故曰任民自趨。則最利之塗出。最勝之業興。此治國者所以不勞而財生也。

約以言之。其故有二。一役財者。常以鄉國爲便。而以遠外爲危。但使贏率不相懸殊。必舍遠擇近。而以爲國中之商業。如是。則其財之所鼓養者。皆本國之民功矣。境外之貿易。不若中外之貿易。中外之貿易。又不若國中之貿易。治業者之情。常如是。蓋爲國中之貿易。其所斥之母財。常在目前。易以加察。不若境外者之遠而難稽。業近

則其母財所託之人云爲動作皆可周知。即不幸蒙欺。至與訟獄。本國刑憲又所諸習。而其財易以復。此其所以利也。至境外貿易。其母財常分於二邦。地以遠而難知。事以懸而難理。所與託付經紀之人。其情常不可信。今有安蒙斯他丹商。用其母財。以致苦匿斯勃之穀麥於力斯彭。又致力斯彭之酒果於苦匿斯勃。此正所謂拍商之業也。則其母必中分於力苦二地之間。而於安蒙本已無所用也。故如是之商。恆於力苦二地擇一而居。其止於安蒙者。必有所不得已者也。然以其地之遠而難知。事之懸而難理也。則其情常欲移遠就近。凡力苦二地往來之貨。苟無所失利。必使之多經安蒙。雖緣是而有車舟起卸之益費。關梁譏征之加煩。所不恤也。要以使母財之用近而易稽已耳。是故捐商盛者。其地若倉庾然。常爲百貨之所歸。治其業者。又常喜於就近求銷。以省後出之費。由是前所謂境外貿易者。乃漸轉而爲中外之貿易。而中外之貿易亦漸轉而爲國中之貿易。則總而論之。商之爲業也。以其所居之地爲國中。其所斥之母財。經營雖廣。常內拱而輻湊之。繞樞而流。有離而遠去者。

其偶而非其常也。夫同一母財之用。以利國利民言。境外之貿易。不若中外之貿易。中外之貿易。不如國中之貿易。而民之自擇。又樂近業而憚遠圖。如此。則爲國理財者。聽商者之自趨。而其國已利矣。

二、發貯逐利之家。既瞻民功矣。則其功之出利。必求其最多。又常情也。夫施巧成物之事。被其力於五材。而交易之價以起。故瞻功者。贏利之厚薄。視被力者。增價之多寡。出財瞻功之求。虛不厭其厚。被力成物之增價。亦惟其多。然則任工者之自趨。而民之所治者。又皆最勝之業矣。

今夫一國歲殖之多寡。視其地力民功所歲登者。易權之大小。今者一國之商之役財也。既樂近業而憚遠圖。而工之瞻功成物者。所增價又必求其最多。如是。則民之所爲。皆擴充一國歲殖之事矣。必謂彼以公利爲期。知其有益國之效。而後爲之者。是又不然。彼之舍遠而事近者。求己財之勿失耳。彼之務厚而不爲薄者。求所贏之日多耳。彼之所各恤者。皆己私。而國莫之爲。遂享其大利。且國之利。豈以彼之各恤。



其私而或損哉。惟民恤其私而國以利。其利國乃愈實。賢於誦言利國者之所爲。彼誦言利國者。吾見其人聞其語矣。於國固未嘗利。且以彼之私而國以病者有之矣。

吾方役財以求利。必操何業。而後吾之贏得乃最多。此惟當局而承其利害者。其謀爲最詳。斷非居民上操政柄者之所能及也。今乃民役私財。不任自謀。而執政者爲之代擇所宜。此不特教之以其所不請。且不悟其事本非他人所宜與聞。且非國家所宜問也。夫商業之事。消息至微。會當局者之自圖。將委之獨斷。一謂執政者一委之衆謀。一謂議院之衆。一而皆誤。彼不請而教者。固自命精能。而宜爲國民前導者也。不知此不請而教者。其愚且妄乃尤至。而僥人之事乃尤烈也。

夫曰代擇所宜。不請而教者。非必執衆商之家。而強聒之以所宜忌也。張之教條。予以專利。使國中所銷售之某貨。所雇用之某藝。必其民之所自供者而後可。此則與民役其財。而上教之以必從何道者。異而實未嘗異也。夫欲國中所銷售雇用。必其

民所自供者。此具律令條教。非無益。必有損矣。何則。使本國所產其廉善。與外來者  
埒。則是無益也。若不及。是有損也。吾聞川舍翁之教子也。曰。自製費。而別購廉者。必  
購而勿製。冠者不自爲履。必購於業履者。社者不自爲冠。必購於業冠者。耕者不冠  
亦不履。而各求於業者之家。此非拙於計利也。知利莫若各勤其所獨擅。有所求則  
帝易而勿自爲。以其費時而損利也。家而如此。國胡不然。家有專業。而國有專產。夫  
使外國供之而廉。國中自供之而貴。則物非吾地利民巧之所獨擅者。明矣。則與其  
自供。何若出吾所專產者。相與爲易之爲得乎。今夫一國民功之盛衰。獨與所斥之  
母財有比例耳。不以有所外易而或減也。置所與易之功而不事者。固將以事吾所  
最宜者也。最宜云者。同以一日一人之力爲此。其被功成物之值。較之於爲彼將有  
贏也。且國所最宜於何而見之乎。知不在於向所易者。以自供之貴於外求也。自供  
既貴於外求。則任民自趨。彼將必出於爲易。其所易之功力。必節於自供之功力。其  
取易之價。必廉於自供之價。一交易而利生焉。乃向之出令者。必使之自供。是使民

業必舍所宜而爲其所不宜。是使歲殖之易權不加多而見少。號曰富民。直背馳耳。或謂國於各種製造。其始固未必皆能。惟民不求於外而自供之。久之以習。將自供者未必不廉於外求也。夫始不能而今能。則禁進口予專利爲之耳。安見其令之皆無益而有損乎。曰是不然。夫謂禁外易而民習自製一事也。謂民習自製而歲殖加多。國以進富。又一事也。爲前說者是。爲後說者非也。蓋歲殖以所鼓之民功爲比例。民功以所斥之母財爲比例。而母財又以民歲入之有餘而積者爲比例也。方其禁令之行也。歲殖必以坐寡。而民之歲入不舒。歲入不舒。未見其能有餘而積也。無所積。故母財不增。母財不增。故民功不進。民功不進。故歲殖無所加多。而國無由以進富。此禁外易者之終效也。是故欲民財之有餘而積者。必聽用財求利者之自便。此斷然可知者也。故雖不禁進口。不予專利。而所求之某貨。緣是永永不能自供。其國未嘗困之以貧也。蓋國之母財。用者常有此數。聽民自便。其所趨之業。將必爲其所獨擅。所出之利。必期於至多。而歲殖母財。皆緣是而交進焉。

夫土宜民業之不同其相懸絕有萬萬不可以人力爭者今如葡萄之爲酒雖以蘇格蘭之寒瘠使必爲之則爲煥室爲陽房亦可以出美實爲佳釀而無如其價之三十倍於南來者何也今使當國者欲吾民自爲此酒而禁布根地與加拉勒（二酒名）之外來其事爲愚乎爲智乎誠使其事爲愚則三十倍其已甚者耳即至三倍或百而增三或千而增三凡如是者皆與愚爲同事何則多寡不同其損利均也國各有所獨擅得諸天者爲土宜得諸人者爲民巧置其所擅而爲其所不擅無所與易不得已而爲之猶可說也有與易乃禁之以自爲損利之事以此謀國導民智出墟市小民下矣

拒外貨而專內市工商之民尤欲之其利野業則有限也今使禁牛羊之入關而加外至之穀麥以重稅此在中樞之年亦與禁人等矣然而耕牧之民未必利也蓋熟貨之轉運輕而細者所費尤微非牲畜穀食所可比故通商之業熟貨爲多贏率稍優即可占銷土產獨至生貨非甚厚之利不能今使國家悉弛熟貨入關之禁而平

權之則本國製造之家必爲所病甚至僥倖未可知也至於生貨野業所登雖舊禁宏開恣其外至吾之耕牧無恙可也

案國家雖扼外來之貨而使本國工商得專內市然非工商之家數爲限制則猶無益也蓋使國人得以競操其業則斥母以治者其人必多而贏率日下且以獲利者之驟多其贏率不及通行之率者有之惟此等專市保商之法終不足以獲利故英國當議去穀法一凡條令賞罰爲稼穡而立者謂之穀法一爲自山商政之時工商之家人無異議而樂守舊者轉在山主農人蓋其情與工商異也

牲畜入關禁雖盡弛至者終不能多而無山與吾牧競利百貨皆便於舟漕獨生口不然生口陸行自致者也海運則不獨生口有礙而芻豆水飲皆長費者矣不列顛之與愛爾蘭相望一神海耳故其生口至英無難然即使牛羊永遠弛禁吾知其於英之牧利猶無損英蘇西偏傍海之地皆牧場愛之牲畜至其地莫售須更東逾大野乃得市此甚大之費也畜之肥者不任長驅其遠必其瘦者如此則所侵非苗飼

填肥者之業而在孳乳蕃息者之家。若瘦者之價因多而賤。於苗飼填肥者無損而反利故耳。然觀於弛禁之後。愛之牲畜來者無多。而市中瘦牲仍售善價。可知卽孳乳蕃息者亦未嘗受其損矣。吾聞愛爾蘭牛羊出口。小民緣此大譁。群欲沮之。然使其利果厚而爲國之所不禁者。小民雖欲譁沮固不能也。

夫牧業旣分孳乳苗飼而爲二。爲苗飼者必已墾滋沃之場。而孳乳之事雖斥鹵未闢猶可用也。故國中瘠牲價高。能使未闢之壤收利不薄。此無異懸重賞以沮治闢矣。國之田野甚闕者。以納外至之瘠牲以苗飼而不自孳乳爲利。今荷蘭民所爲正如此。吾英之蘇格蘭衛勒斯及那丹白狼諸山部瘠确。天然孳乳之地也。使國中戶口日蕃。財富日溢。瘠地孳乳之利將亦不貲。當是時而弛牛羊入口之禁者。於此等業所傷實多。而通國之民則免於肉食奇貴之苦。肉食奇貴者無異取國中膏腴田野而徧加地租也。

醢肉進口不禁。於國中牧業尤無損。醢肉輸國難致。其材常較鮮者爲劣。以醢漬加

鹽之故其價不能甚廉勢不能與本產之鮮肉爭市所爭者特本產醃肉而已醃肉之用海船走道遠者不得已儲之至於民間之賸膳贈賄資之者少矣近事愛爾蘭醃肉至者不禁爲數甚微則知其利之薄而操牧業者不必憂見侵矣

卽至穀麥雖盡弛入口之禁於吾農必無大損又可知也穀麥以比屠肉其占位尤多占位多則運費大設每磅之麥僅一便士其貴實與乾肉之磅四便士者相當下稔告饑之歲穀麥外至者尙且無多則可知其利之薄而弛禁之不必病農矣嘗考吾英進口穀麥通數年而取其經數歲不過二萬三千七百二十八括打劣通國每歲民食五百七十一分之一國家每逢穰歲則懸賞以獎外輸由此穰歲之出者多屈伸相報則每逢凶荒入者亦以稍益向使爲政者因任自然將糴緒之數皆減截有餘補不足國中之穀豐歉相劑矣惟轉穀之商其業以穀之出入日煩爲利出穀之農固不耐也使國家一旦撤外輸之獎弛入口之禁更取一切穀法而悉去之受其損者將在穀商牙伯而不在田主與農人故樂守穀法而無變者非農也商也

案穀法爲英倫大政。自前明正統元年至道光二十二年。此上下四百有六年之間。所有事於救荒相農。遇客伸主。穰而外糴。歉而內糶。其條令科征。至繁密矣。而於其民。實無所利而未嘗無損也。斯密氏原富之書。共分五部。其第四部。大抵論此。自其說出。議政之家。什九主除穀法矣。而富民有瘳於近。無見於遠。議卒不行。至道光十九年。戈布登。下來德等諸商。立關穀法會。於孟哲沙廣刊。計舉。序嚴諸書。頒於鄉塾。而衆議洶洶。直至道光二十六年。英相皮勒魯勃當國。始大減入穀之權。越三年。而大通商法。一亦譯無遮。通商自由。商政一行。穀出入皆無稅矣。英穀法之始末如此。雖富強之運。有開必先。不可謂非斯密氏是書力也。所可異者。斯密氏此謂穀法果變。將所損在商。而於耕牧之民無害。然則樂守穀法。而無變者。宜在商。而不在農矣。顧當拿破侖喋血歐羅。以至寶身孤島。民獲忘肩之後。其同聲合力。務去穀法。與他保商之政者。皆工商邑業之民。而農牧之衆。轉出死力。以與新政爲難。甚至穀法既廢十餘年。以歐洲牛疫之故。英國閉關畜牧者。收習



得之利於此時尙有欲復其令者則又何耶夫大通商法行之久遠必利於國誠無可疑獨至近小之端則其理亦有時而不驗田野鄉僻之夫服守先疇見聞褊狹其計利廣遠與時推移不及操邑業者固其所也

又案英國當乾隆間如斯密氏言其進口穀食僅二萬三千括打有奇抵其民食五百餘分之一耳至光緒丙子丑間其進麥以括打計者二十六兆而當其民食之半或三之一蓋中量七千八百萬石矣百餘年進盛之實如此此豈可以尋常計數進退論哉計學家以謂此不僅國加富庶之所爲而亦舟車利通轉運徑捷之故然舟車之所以利通汽舟鐵軌爲用一也漕渠廣開二也舟製日精三也海圖日密駕駛日精四也歸極言之則大抵皆由於學術此天算格致開物成務之功有必不可誣者矣且其民食出於外國者之多至於半本國之所產而土著之農未常病且樂利之愈以見斯密氏之論之不刊也

所貴夫耕牧之民者敦龐樂易而無壟斷專利之私製造工廠聞同業者開廠立肆

相去百里之遙。輒惴惴然恐其妨已。如荷蘭亞伯威。毯業欲國家著令。不許人於三十里格之內。更設毯廠。是已。惟農家田民則不然。不獨於鄰封樹畜之業。無所妒嫉也。且樂觀其隴畝之治關。耕作之勤劬。業異工商。無所隱秘。果有可資利賴之農術。則樂與同昨共井者。公而用之。此羅馬農家嘉鐸所前言者矣。且如是之民。常散處國中。聯合糾斷之事。不獨不爲。卽爲之其勢亦不便。彼工商之業。同城共居。業約工聯。因之並起。凡爲專利而有事者耳。故嘗謂禁入專市之政。必起於工商。而農民從而倣之。其敦龐樂易不私利己之風。遂浸以微。顧不念其業與工商大異。宏獎廣納。使四方之貨至焉。方爲其業之利。奈何從而尤效之耶。

國禁牲穀外來。名曰衛農。其實非也。徒使其國之戶口生業。限於本土所生所養者而已。故沮外產之通流。其終常以自屈。雖然。有二端焉。行之而其國以利。

一。所保護之業之盛衰。有關於其國之強弱。今如吾英國勢之振盪。邊防之疏密。視習海之民與夫船舶之多寡。則航海之業所必爭者也。故其海運條例也。亦本此意。

而使本國之水手舟航在在有專利之益。於外人則設爲政法以困苦抑絕之。蓋所爭者不徒商利而已。海運條例其目如下。一凡船舶其業主船主非英國人抑其船之水手舵工英產者不及四分之三則不得於英之沿海運載人貨亦不得來往於英國英屬之間。犯者船貨沒官。二凡運土貨如穀麥木料及某某物至英口者照第一條例其用出貨之國船舶者稅加倍。方准進口。其以他國船舶運載者船貨皆沒官。三自注荷蘭人走海爲梢商者最衆此例行其船不能入英口矣。三凡運貨如穀麥及某某物必自本產國運英其由他國轉運而至者無論用何國船舶船貨皆沒官。四自注此條亦對荷蘭而設蓋當時荷爲歐洲都會百貨多先聚其地而後通四方此例行而荷蘭失屯居之利矣。四凡乾魚及鯨鬚鯨油若他魚鰔不由英船捕獲曬製者其進口稅加倍。五自注當是時荷蘭漁業甲歐洲此例行其貨至英者無所利。一凡此皆以力爭海運之利者也。此例之立始於戈洛韋爾護國時。所謂長議院者議行之。一議院之制其聚散皆以王命此時國無王議院聚而不散故號長

也。一蓋先是英荷交惡。自此例行不久而二國遂戰。由今觀之。例意固不必本於計利。亦非由於國強。特交惡之深。而後出此。然其有益於固圉之圖。雖智者之慮。無以過此。當是時。能與英爭海權者。獨荷蘭耳。使其船舶降少。走海民稀。固吾英之上計也。

苟自便商富民之旨而觀之。則前例爲無當。夫國與國之爲通商也。其理猶民與民之爲市。大抵販賤賣貴。取於最廉之家。而與於極之高價已耳。最廉極高者。擇於衆多之謂也。故關梁大通。而後貨之能來者無不來。能來者無不來。則擇其最廉也易。且來者既以商爲業矣。彼非徒鬻其貨已也。來爲鬻者。則去爲販者。故欲吾國產之價極高。必販者之衆。而後可。販者衆。必來鬻者衆。來鬻者衆。必關市之大通。然則販賤賣貴之事。皆必俟國無苛政。而後能之。今海運條例之立也。外國之船。其來爲吾英通貨者。或陽禁之。或陰沮之。彼既已困矣。而徒免出口數宗之稅。以勸其通。不知彼來者既無可售。則其去也亦不能購。必使虛來而實往。彼之來貨。又烏從出乎。故

通商之事。屈伸相酬。吾既爲之令。使其來鬻者寡矣。則必至之效。將亦販往者稀。來  
鬻寡而販往稀。則販賤賣貴之事。適得其反。何則。所與通者寡而爲競者微也。故曰  
以便商富國爲期。則其例爲無當也。雖然。自固其圉。又謀國之大事也。其重過於便  
商而富民。故海運條例者。終爲老成謀國之事。吾英海政。其以此爲最良者矣。

宋斯密氏之論海運條例也。可謂自信不篤者矣。何其言之多違反耶。故後之計  
學家羅哲斯曰。斯密之美海運條例而不爲採駁也。殆繫於當時之議。而謀議不  
發耳。以本書之例言之。則境外稍商之業。民自計其贏失而避趨之。必非政令之  
所能沮勸也。海運條例。至一千八百五十四年盡廢。而其後海船且日多。習海之  
民亦日衆。未聞坐是以加少。而英之海權以致微也。且當戈洛慕爾之行此令也。  
荷蘭之海權甚張。又未嘗受其跼也。則吾不知所謂海運條例者。果何所用也。往  
者當斯密氏時。英國家常令錄屬軍官。率數十百水勇。馳驅使隊。遊行市中。強募  
人走海。或往印度。民於是始視海爲畏途。此其有損於英之海權。過於竟廢海運

條例遠矣。彼坐堂皇而議者所見不逾庭陛間。遇一弊不審其遠因。施一救弊之政。亦不思其遠果。故其所得乃無往不反。其所期其病國之尤。將斥之而不暇。奈之何。設淫辭而助之張目耶。

二進口貨與國中所產同物。本產有稅。則進口者亦宜加稅。庶不使本產之稅。畸重而受損也。今使進口與本產者稅均。則爲天下至平之政。蓋本產於國中之市。無所壟斷。則民之役財展力。不至於偏趨。進口之貨。同於有稅。則民之欲爲此業者。不至於裹足。故均稅之餘。內外二產。平均爲競。不異其初。但英國政府常法。凡本產有稅。而外至物同。欲以平民氣之。且杜抑主扶客之謗。則於進口者。稍加重征。過於本產。由是平均爲競。自由通商之勢。稍稍偏矣。

顧或議曰。欲持本產與進口二者商業之平。其應行加征之進口貨。宜不止於同物者。而後得之。如一國於民生必用之物。如衣食之屬。既稅之矣。則進口貨之應征者。宜不止於布帛菽粟之屬。必於凡進口者。無不加征。而後爲平。蓋既征民用之所必

一  
需則衣食貴。衣食貴則民功貴。民功貴則國產之出於民功者無不貴。故征民所用必需者。其效與無物不征等耳。何則。一切國產。固民力之所普存也。故欲持本產與進口二者商業之平。而不使之爲所偏勝。宜於進口之貨。物物加征。夫而後乃得其平也。

然所謂民用必需之物者。亦自有次第焉。今如鹽如繭如皮革如膏蠟。亦民用所不可一日無者也。而吾國奉征之。由此而民功果加貴歟。且以民功之貴。凡民力所產者。將緣之而皆貴歟。是難言也。獨物之緣此而貴。與夫緣本業加征而貴者。其異有二。物以本業加征而貴者。其所加之多寡。所及之廣狹。盡然可計者也。由民功貴而皆貴者。所加之多寡。所及之廣狹。渾然不可知者也。其所貴之度數。既不可知。則於進口之貨。所應加之征權。又烏從而定之。此其難一也。國之賦稅。加於民生之所必需者。其效猶天時之隔并。地利之瘠碩。蓋由此而衣食器難。待勤力厚費而後出也。今使國有天災。地產劣薄。於此之時。爲之治者。固不如行寬大之政。聽民之各擇其

所宜假使設爲條教必區民之財力開其爲此禁其不彼則人將皆以爲妄矣夫加稅以抑進口之貨者無異設爲條教區民財力開其爲此禁其爲彼也而川之於賦稅已重衣食舉難之國山雖有天人異而其爲妄等耳行寬大之政區民自擇其所宜則國之賦稅雖重民猶能各奮心思各勞手足以求遺利之最優者以自救乃今以本國衣食之既貴反重征外來之貨必使之無物能廉則是既征於其前矣又從而征之於其後夫議者之意固將以扶民而善國也出以是術直不如其已耳此其難二也

夫如是之稅之殃民與地之斥鹵天之積寒同其效乃往往見於土壤膏腴民力勤奮之國者非如是之國則弗堪也猶夫縱俗戕生飲食無節而其人猶可以視息生存者其天秉必獨厚者也賦斂刻深百產騰踊而三國猶可以樹立不顛者亦以天形民材有獨優已歐洲諸國因於無藝之賦者荷蘭爲獨深而以形勢之便民力之勤至今猶足爲善國富於餘邦乃議者昧然轉舉之以證其改制之善夫亦可謂慎



已。

前謂沮抑外產不許通流國中獨有二端其國以利既詳論矣此外尙有一事其舉措宜爲之審慎者如既縱外產入國銷售宜如何以立限制一也外產業經禁沮宜如何而後可任復售二也

所謂縱外產入國銷售宜如何以立限制者譬如彼於吾國之貨禁沮勿納或加重權則以報復之理言之雖於彼貨至者亦拒勿納或加重權困之未爲不直也故各國其貨爲他邦所沮抑者未嘗不亦取他邦之貨而沮抑之法國計學家最持保護本國工商之說者也故凡外貨入法與其本產爭銷莫不開關或加重稅困之哥爾勃王法財政數十年常以此爲要策哥幹局識最輝映一時而不免爲此者蓋爲工商大戶邪說設辭之所益工商大戶以專利爲本謀者也至今法與通人談其軼事則皆以哥所爲爲無益而自困者以云利國偏其反矣其一千六百六十七年所頒稅則外產入法十八九皆加重稅荷蘭以爲言哥弗聽至一千六百七十一年荷蘭

亦禁法來諸酒不得售由是而有次年之戰爭商利也越六載而荷法兩國平定條約於荷之甯梅津法於荷貨釋尤減稅荷則罷法酒之禁焉當是時英法亦交取所往來貨因抑之而法實先發兩國相齟齬久至一千六百九十七年英禁伏蘭德所來之偏諸（俗名洋花邊以麻織者）伏屬西班牙故西班牙亦禁英之氈罽以相報一千七百年二國始平乃各弛禁由此觀之報復之事特出於一時憤好之私誠使統前後之損益而通籌之則知如是之政有非知計者所宜出矣夫使彼禁吾貨之去而吾亦從而禁彼貨之來彼病吾禁而欲其弛也則將取彼禁而蠲之轉以資吾之開彼則吾往者之尤效特有爲而爲之雖外貨告絕而土貨暫騰國中民因以弗便顧所復之外市其利實久遠而大過於緣禁而暫失者則向之彼禁而吾亦禁誰曰不宜然彼禁而吾禁之彼禁而不爲吾變者恆有之矣夫察吾之所相報而前知其足以致人者守經之家由其常道其慮不足以及此也慮之及此惟行權者能之機巧夸詐其籌策常主於一時之事變而不主故常是以其議多中今使審於

彼此之情而知吾雖報之以其所爲而彼將必不爲吾變而彼貨之至者又實爲吾國所利資果如是而禁之則是重自困而助敵爲虐者矣彼禁吾一二貨損者不過吾一二三業之民而彼貨至者則吾通國所共需於此而禁之於前損之一二業固無補而因報復之爲乃自致通國之民於不便而損利以是爲計可謂智乎且彼禁吾貨復止於數端不必盡所往者也而吾之報彼而務懲創之也則必大過於其數不愈益病歟吾非不知以是之爲吾國之工若儲以其莫與爭售也將必有數業焉暫得其厚利而無如此所利者固非彼前禁之所損者也且以吾報復之故損與未損之民皆以外貨之莫來而用本產之貴貨是故名曰報人而其實與加通國無名之賦等耳於被損之業固無補而於用貨之民有大征

所謂外產業經禁沮宜如何而後可任復售者蓋外產既經禁沮民之業此者其得利自殷以其利殷而業此者日益衆設一旦前禁驟弛外貨集而與之爭銷其業必緣此以失利閉僥而工傭業此者亦緣是失業爲遊民其數既多甚可閔念故於此

而上欲有所更張。非審慮善處而出之以漸。不可也。此不僅以遏亂萌。亦仁政之所宜出者也。議者之言如此。夫既禁外產。以杜爭銷。則此禁未弛之先。國中業者。其利自厚。以其利厚。作者之民日多。至於禁令既除。或重權之忽減。外產至者。必加於前。爭而失利。故其業必僥。而民之失業遊閒者必多。此其所言。皆無疑義。顧自我觀之。議者所慮固富矣。而稍嫌其過。蓋其事不至於甚禁者。有二故焉。

一、吾英製造之貨。凡不待官獎而外輸者。其產決非外邦所能爭利也。故雖海禁大開。無虞利減。蓋其貨既不待獎而常可外輸。則其物之售於外市。縱不必廉於異邦之所產。其不能加貴。明矣。在外邦不加貴。其在本國必廉過之。何憂外產之競其市利乎。固亦有執袴之子。喜新逐異之夫。雖土貨之於外產。工善而價廉。終不以此而易彼。顧此非人情。而常居最少之數。則外產於土貨。雖遇弛禁。不能害也。吾英則器設革。至於冶鐵諸業。其所養民功至多。其成貨皆不待官獎。而常銷於大陸諸國者。其工善價廉。乃本於地利民巧之自然。而斷非餘國所可及故耳。乃今謂此屬之工。

將以海禁忽弛失其利者。吾不信也。海禁弛而土貨受其敵者。其在英之絲業乎。絲業而外。則困者將在麻桑之功。然不若絲業之已甚也。

案斯密氏之言。後皆大驗。其始法國各利絲貨入英者。皆百征十五。名以保護本英絲業。然卒不盛。至咸豐十一年平稅。英之絲業遂廢。蓋國之天時地利。皆不利蠶桑。而水性風日。亦不宜於烘染之事。強而爲之。亦終以無利也。

二。國家政令有所變置之初。固不能於民無少損。故謂海禁盡弛。外貨入口。不加重征。吾民業非其土宜者。將以失利。此篤論也。顧必謂失業之民。無業可改。必至於飢。其說已不必信。更謂失業者衆。將兆亂萌。則尤不必然之說也。蓋者吾歐兵戰皆休。海陸諸軍。撤者逾於十萬。此雖國中至大工業。其中傭作之衆。必不及之。遊閒失所。固不待言。然未聞其衆之終於無業而凍餒也。海軍之衆。漸爲商船所收。而陸卒亦各求生涯。雜居熙攘之中。不復可見。夫此十萬之夫。以執兵犯難殺人致死爲業者也。當其臨敵。虔劉剗掠。日日行之。以如是之人。其暫時失所者。至於十萬。然未聞

都邑饑饉而民氣稍或不靖也。游閒之衆不見以之增多。雜作之傭未嘗以之降賤。此特近事。猶在人耳目所覩記中者也。夫卒徒如此。則工業製造之衆何如。習於執業之幼。其改之也自易。不若卒徒之不馴而難變也。卒徒仰口待餉。而工必賴手足之勤而後得食。一習於勤苦。一習於浮習。浮習者猶可以就範。勤苦者之改業何難焉。吾向謂工業之事相似者多。舍此就彼。不習可能。至於南畝之勤。愈爲盡人可服者矣。總之一業雖僥。其業所前用之母。猶在國中也。母財之多寡既均。則所鼓功役之數自等。特業與地殊耳。往者卒徒之撤也。任執何業。國法無或沮之者。今使國家條令。其待工傭之衆與卒伍同科。任執何業。亦無或沮。去工傭之專利。罷徒限之拘率。而擇地就食。無爲鄉籍舊法之所困。將見國之勞民失於彼者。必收於此。去死法而得生機。浩然自由。莫有捉搦之者。則一業之改。於民既無大損。於國且以爲利。尙何滋游民而職亂階之與有乎。且國家之待工民待之如兵。斯已可矣。工固良民也。而兵則且有扞衛之事。汗馬之勞。必懇懇然喚咻工民。過於所以待兵者。於事既無

益於理又失平也。

以吾英今日之民智國俗。望其一日而政之大通。去障塞。捐煩苛。俾民自由而遠近若一。此其虛願。殆無異於望吾國之爲烏託邦。一烏託邦。說部名。明正德十年。英相摩而公瑪所著。以寓言民主之制。邦治之隆。烏託邦。烏國名。猶言無此國矣。故後人言有甚高之論。而不可施行。難以企至者。皆曰此烏託邦制也。一蓋不徒舊法之難變也。一遷改間。動關私利。意所弗欲。則群然起爲難矣。向使將兵之家。其保持兵權。亦猶製造者之力保專權。又使將兵者。鼓煽所部。以拒裁抑之新政。亦猶製造者之登其儲備。出死力以抗新章。則裁抑額兵。將爲亂本。欲其稍抑私勢。以伸國權。蘇民力。必不能矣。蓋惟其利之既專。乃其徒之目衆。此亦猶擁兵者之負固滋蔓。卒之尾大勢成。而轉爲行法者之所忌憚。而不能制。今日之事。豈不然哉。兩院之內。議政之員。有主於護商專利之說者。則必爲衆學之所歸。通達商務之名。滿於都市。巨室富商。附者必衆。此固議員發而諸君所樂出也。設其議反此。而與專利之說。驕馳。又

使其人勢力足以行其議則益爲國人之所忌雖有大名顯爵動伐震時無救其爲衆怒之所歸群矢之所集甚且衆辱之狙傷之矣蓋國人專己之私其難犯有如此者。

案觀於斯密氏此言則英倫平稅之難行海禁之難弛於其時若渺然絕無可望者然自嘉道之際英相萬錫達當國之後言商政者大抵以自由大通爲旨至道光二十六年而平稅之政行矣其去斯密氏成書之日爲時僅四十有五年而已夫何必其國之爲烏託邦而後能哉論者謂考英國計政之所以變而國勢之所以日臻富強者雖曰群策斯密氏此書之功爲多觀英相弼德自云必讀斯密氏原富全書而後可受相位一言爲知豈誣也哉竊嘗謂凡此皆運會之事運會既丁雖斯密氏未爲原富而著書言計者終有其人歐洲十八十九兩朝之中其世事之變動而日進於光明者不知凡幾蓋自物理格致之微以至社會文明之大高而遠之至於天運律歷切而近之至於德行性靈之學無事不日趨新理而古



說漸衰。且舟車棧通。坤輿翕闢。殊方詭俗。日相觀摩。若共井里。聰明之用。日月俱新。夫如是之民。謂微斯密氏之書。猶昧於食貨之理者。吾不信也。故吾中國之處今日。其常憂於無救。而卒爲擾黑二種之續者。病在自黷聰明。不察理實已耳。至於專利順私之害。猶其輕焉者也。

然則弛海禁而平進出之權。外產入國。因而驟多。以與土貨爭市。土貨利微。其業將饒。此其受害。亦不輕矣。蓋製造母財。常分二宗。一曰循環。一曰常住。當其必不得已而改業也。循環之母。所以康功食庀材物者。可以他移。而常住之母。所以建廠肆置器用者。既已前費。無從變也。既無從變。則皆虧折。故變置法令。宜以漸。不以驟。宜豫識。飭使民早圖。此仁政所必出故也。夫士出爲國家理財。有所措施。張設則務高瞻遠矚。舉通國之利而籌其全。何可贊於一民一業之說。而徇其私利耶。舉權輿斷之。政不徒未立者不可立也。已立者縱不能祛。必勿推廣。每見國有專利之法者。未有不終爲道國者之荊棘也。忍而弗圖。則國之利源壅。舉而更張。必有受其損者。此說

不可不審處熟計者矣

夫國有與立誠不能以無費爲之則商旅之至取而征之有國之通義也所務者征矣而毋苦商旅有益度支政公而利宏焉若夫關征煩重致外貨裹足不欲復出其途則既沮商政之流又塞度支之源與富國之術背馳已耳

### 篇三

論兩國通商以進出差爲負而設法沮抑來貨之非

一其非理自商宗計學之說觀之而見者

國與國通商心疑進出之差爲負則竭氣盡力務爲一切之禁遏惟恐其國來貨之或多者此商宗計學所以爲國廢積金銀之第二術也（分見本部篇一）如英法之事是已吾英之於進口貨也同一紗布於日耳曼之產則納之於法蘭西之產則拒之同一葡萄酒於波陀喝爾之產則稅輕於法蘭西之產則稅重一千六百九十二年所定稅則凡法蘭西諸產至者皆百征二十五而餘國則二十取一焉一千六

百九十四年猶以是爲未足也。則又加二十五之稅。未者獨菩蘭提酒耳。此外尙有助餉之捐。則計噸征收者也。總之法產入英。不分生熟。其最輕者亦百征七十有五。此名爲稅。實與禁絕無異。而法於吾英之產亦然。嘗怪二國中間。不過一海袖之隔。名通商而實不通。於是偷漏利重。民所用者皆闖入之貨矣。其事起於彼此互疑。謂縱之則進出差必負。而國中金銀將日減耳。故其沮抑之者。與前篇所言者又異。前之沮抑起於工業之專利也。而此篇之事。則大半起於兩國之交惡。故其政法尤爲倍理。即以商宗之理論之。已有不可通者矣。

一。今使當國者取一切禁遏之政而悉除之。詎蕩大通。而吾產之銷於法者。果不及法產之銷於英者。進出之差。顯然爲負。貨相抵不足。而務償之以金銀。就令如是。此不獨自大通之道言之。於吾英之財政爲無害。即以商宗之說言之。於吾英之金銀亦未必果有損也。法之酒固廉。且美於波陀。噶爾之所產者。法之紗亦廉。且美於日耳曼之所產者。則吾舍波日而取法。法之來者固日多。而波日之來者必日少。是吾

失於法者。收之於波日而猶有餘也。夫何損焉。此即法貨來者悉銷於英。而所謂漏卮已坐減矣。況吾所運之法貨。固不悉銷於英耶。

二、英之受法貨也。固不必皆內銷。而半資外轉。凡轉必加贏。是吾即出金銀與法。而所收於各國者方多。印度大東諸商業。亦以銀購貨者。而未聞爲此者損也。其於法何獨不然。荷蘭商務。以銷運法產爲大宗。即吾英所銷法國酒膠。亦多展轉由荷蘭至者。今使海禁宏開。則吾英海船之多。其可以奪荷蘭利權久矣。作法自斲。甚無謂也。

案通商之進出。還有二。一、本國與一國較。一本國與諸國較。與一國較。其差雖負。而其實利者有之。若與諸國較。而差實負。則漏卮不免。非金銀出國。則負債矣。斯密氏此二條所指。皆失於一國而收於餘國。正所以救漏卮也。

且兩國通商。其事最爲繁賾。往往進出之差。無從指其正負之實。人章自私。以正爲負。時時有之。至於兩爲敵讐。則其言愈難信矣。常法稽兩國進出之差。而得其大較。

者不出二說。稅關簿錄一也。兌費麻細二也。順稅關評定物價。事求簡徑。因多機略。故其所綜。常非物值之真。而不可以爲典要。至兌費之不足依據。亦與稅簿正同。以兌費麻細定兩國通商進出差之正負者。譬如倫敦巴黎兩都會之間。由倫敦兌銀巴黎。兌費平等。則知兩國債通。約略相抵。而彼此交易無進出之差。假使由倫敦兌往巴黎。其付銀須比由巴黎而往倫敦者多。則知英之通法者鉅。而法之通英者微。兩通相抵之餘。而有不足。兌往者須以見銀。而一切保險運致之費。因之而起。兌者貴也。則進出之差。在法爲正。而在英爲負。可以無疑。蓋其意以爲尋常債負之事。必從交易而生。其交易均者。其所通必等。通之不等。其所受之貨。必過於所售。而金銀由此趨彼。以濟其所不足者。勢也。故曰。觀兌費麻細。而進出差之正負多少。可以見矣。其說如此。

然而吾以爲不足據依者。蓋債通往來之差。未必即爲貨物進出之差。而債通之差。之正負。又不必即爲貨物之差。之正負也。債通之起。委折又多。故兩地之債通。不恆

出於兩地之徑爲交易也。視其地所通之廣狹，其牽聯及於數地者有之。譬如倫敦之商，購貨於罕布爾、格丹、輯克、力嘉等所者，其吐勒作兌款目，恆指於荷蘭之都。則英荷之償通，不可指爲一國交易之形表，而實爲所通各地懋遷之徵驗。明矣。英之出現錢以兌荷者，每歲雖數至多，而英貨之至荷者，實過於荷貨之至英者甚遠。其進出差，又於英爲正，於荷爲負也。然則兌費之高下，又烏足倚之以定進出之差乎？兩國兌費麻細之間，其難據以定商業之進退者，尙不止此。蓋時俗之所謂麻細，其麻細之實，尙爲難定故也。則即以商兌之事明之。譬如由英欲兌往巴黎，足色銀若干翁斯，其版克承兌者，則按照泉局表列價目。每翁斯應幾先令幾便士作算付兌矣。單至法都，取者亦照巴黎泉局表列價目。每翁斯應幾利佛幾蘇發付。一當時佛郎之制尙未行，佛郎之行自革政後也。一如是者，名平兌。設令由英付者浮於前數，則兌市在英爲細。在法爲麻，不及前數，則英法兌之市反此。此時俗所指以明彼此通貨之差，而即以明進出之差之正負者也。雖然，其事有難者，則以各國通行泉幣

精窳互殊。圖法章程不一。而版兌鈔業。衡量不齊。致名實紛殺。往往付予授受之間。求其銖兩適均。至爲不易。其所謂平者。名平而實不平。所謂贏細者。未必果爲贏細也。則何足據之以定差數也哉。

所謂泉幣精窳互殊而贏細難定者。蓋通行泉幣。其出治有久近。其摩損有淺深。而泉局所表列者。皆指足重之完幣而言。顧兌收者以實不以名。而後有贏細之可論。而得用之以課差數也。使如吾英威廉第四之代。圖法未脩之初。其泉幣之精惡。名不及實者。百常二十五而有餘。而其時英與荷蘭爲兌。雖較平兌者百多二十五。然不得據此而云荷贏英細也。名雖云然。實則反是。在英之所付者常少。而在英之所受者恆多。又法國泉幣。其時亦較英爲善。其比英較近於法錢者。百率三四。則使由英兌法。所較平兌浮者。不逾此率。亦皆名細而實則贏矣。此其難一也。

所謂圖法章程不一而贏細難定者。吾英三品之幣。其由鋌成泉。雖制作至精。不加煅費。民持法銀一磅至泉局。收回先令銀幣六十二枚。權色悉等。無所減損。征抽。蓋

一切冶炭模範之資皆出之矣。而法國則不然。其爐費值百取八。以供冶炭模範之資。而國家尚有薄征。故英國三品之金。在鋌與泉重均。則價無異。而法國在鋌者廉。在泉者貴。蓋猶器飾之加工資矣。今使由英兌法。但取重同。即非平兌。英羅法細陰在其中。欲求真平。宜加爐費。使所加者不及百八。皆爲英贏。而淺人不知。方且以爲英細。豈有當哉。英法如此。他所兌市。可類推矣。其難二也。

案英國國法。至嘉慶二十一年。稍有變改。每磅足銀。造先令六十六枚。而每磅十二翁斯。成幣後。以五先令爲一翁斯。蓋其爐費逢百取十矣。然其泉幣金爲本位。民用先令納賦償負。至多不得過四十枚。過此則非法幣。可拒勿取。其爲無限法償者。惟有金鎊。而金鎊由鋌轉幣。仍無爐費。而資挹注於銀銅二幣。法國泉局爐費。今亦方古爲微。其定制每基羅金幣。官取爐費六佛郎。每基羅銀幣。則爐費二佛郎也。

所謂版克衡量不齊而疏細難定者。如荷蘭之安蒙斯他丹。德國之罕布爾格。我國



之溫匿斯。其中諸版克出入皆用專幣。一此與中國司部之用庫平海關之用關平而各市之有規元行平等矣。特中國以重言故稱平而各國則以幣言以枚言耳。一專幣價值常較其國通行之衆幣爲優。譬如安蒙斯他丹所出一千吉露特以作其國通行常幣則一千五十吉露特也。而倫敦巴黎他若波陀噶爾之力斯彭比利時之安都爾關勒果安等其版克所用與國中之常幣同。如此則雖兩國之幣精窳從同。鑄造之爐費相若而自不用專幣之國。兌由行用專幣之版克。衡量雖均非平允矣。以有專幣故實則受者爲細。付者爲贏。即令付者數浮平兌而其浮未過所優。皆在贏限之內。更不得徒以名數相量而不考其實矣。一今歐洲大陸各國之度量衡圖法皆大抵用法國革政以後之新章。如斯密氏所云云皆當時事而已。一其難三也。

案此第三條所言在歐洲則爲條見在中國則爲至常假使有人由滬兌款入津但執所載鉢兩爲案而不問規元公砵行關諸平之異則其人去病狂不遠矣。中

國度量衡三者之紛自宋代而已然故蘇明允言東家之尺而較之西家則若十指然此其煩耗心力費時滋弊分則見少積則至多所以沮遏生財之機已爲大害矣而售欺長僞叢弊啓奸所以爲民德風俗之禍者尤鉅吾不意中國號爲文明者四千餘年而於民生最急之端壞亂至於此極此而不圖於他理財之政尙何問焉

又案安蒙斯他丹幣幣之外其版克所以有專幣者考其由來蓋緣荷蘭國地褊小而當數國之衝各國之幣交行其地雜而不純磨漫穿磨者衆於是各國兌銀往其地者知其幣雜則豫爲之地浮溢兌數以防耗虧荷蘭本國以是爲不便也則公立版克約用完幣不雜而外來兌價始平而是幣遂爲版克專幣較之其市所通行者自然貴矣如前文所言其所貴者蓋百五也

二其非理自常道觀之而見者

商宗計學之理專務多積金銀顧兩國通商心疑進出差爲負條禁紛然惟恐其貨

之至者。於務積金銀之計。仍無當也。蓋言通商而持進出差之說者。將無往而不誤。其背謬違反。不徒見於沮抑來貨一端而已。彼之意以謂兩國通商。必進出差汎而不見者。而後兩無虧損也。假其有差。則見正者利。見負者害。其利害之淺深。視此差之微鉅。彼方以此爲無可疑。不之知者。非其狂人。卽爲愚子。而孰謂二說之皆非乎。夫懲還之局。本於民生之自然。任其自然。則當局者交利。獨用沮抑之術。以拒彼之來。懸外輸之獎。縱專利之私。雖貨之出國者。因此而多。其於國未嘗無害也。

案東西二洲古今政策聚訟者亦多矣。往往此一是非矣。而彼亦一是非。獨所謂保商權塞漏卮之說。無所是而全非。蓋使如諸宗計學家言。則通功易事之局。方爲斯人之大厲。何則。其事如兵戰然。必此負而後彼勝。故也。泰西人懷此見者數千年。自斯密氏說行。而長夜始旦。民智之難開。可以見矣。中國自海通以來。通商之政。大道爲公極矣。顧鄙所不敢自詡者。則其事多受制於外。不得不然而非乘成者之高識遠量。果足以及之也。漏卮之說。自道咸以來。至今未艾。其所謂漏卮

者無他。進出差負而金銀出國之說也。此自林文忠魏默深至於近世諸賢皆所力持而篤信之者。歐洲自斯密氏之先。培庚號理家先覺其主英之財政亦深以漏卮爲憂。而斯密氏同時賢豪亦自不乏。皆未嘗稍異其說。則於東方之君子何怪焉。此書所立之說。其有裨西人不知凡幾。顧其說在西人則爲習說之暨聞。在吾黨或爲新知之創獲。此不佞譯事所以獨有取於是書也。

又案專權專利之事。爲斯密氏所深惡。誠哉其足惡也。然而有時以通國公利而論。專之愈於不專。此如創機著書諸事。家國例許專利。非不知專利之致不平也。然不專利則無以獎勵激厲。人莫之爲。而國家所失滋多。故常許之。至郵政電報諸事。其利宜專以國家。嘗有大益於賦稅。不可一概論也。

夫吾所謂進且利者。非曰其國黃白之加多也。吾所謂進且利者。在其地力之所出。民功之所登。其每歲之所加殖。可以贍其民者之日廣耳。今使兩國通商。其所易者皆國中之所產。則兩國交相利。而所利維均。此所有餘。彼則通之。此之得財。彼則復

之始也各出其財力以恢其國中之地產繼乃通其有無而無用者轉爲有用而以和庸息合三成價之理其終利乃散於民間焉是故兩國之民雖不相謀而實爲相養之事以其所易之貨均也故其始之斥母亦均斥母均故國民之相養亦均然則國民受利之多寡相養之廣狹視彼此交通之微鉅使其所通者爲萬則兩國之民各得其萬所通爲億兆京垓則兩國之民亦各得其億兆京垓不能有所畸輕畸重也

然使兩國通商雖以貨易貨而無進出之差而其一所致者皆本國之士產其一所致者非土產而由餘國之轉輸是二國者因亦皆利然其利乃不均爲土產者其民之利豐運外貨者其民之利嗇譬今者英與法通矣英之所受於法者皆其所自產之酒醪而吾英所致諸法者以北美之菸葉抑印度之雜貨此雖兩利利必英少而法多法之母財其用也必散於本國之民而英之母財其散於民而不外漏者乃前此出土貨以與北美印度爲易之費顧其大半之財則散諸古尼亞印度支那之

民而非吾民之所獨享矣。故如是之結局。使二家所斥母財。略同。純用本產者。其民之進富速。藉轉外貨者。其民之進富遲。蓋同爲內外通商。而有紆徑之殊焉。此固前所已論者矣。

兩國通商。無純用本國之土貨。亦無悉爲外產之轉輸。大抵國有通商。皆土物與客產二者雜行。而土貨多者。其收利自厚。夫國不產金銀。則是二物者。亦客產中二物已耳。無由獨寶貴也。今使英與法之通商也。其易法之酒。醇統綺。不以北美之菸葉。印度之雜貨。而以秘魯巴西所至之金銀。則其利之周於兩國也。將在法則見多。在英則見少。顧少矣。而未嘗無所利也。金與銀不能徒至。其由秘與巴而至英。英必以土貨爲易。則今日之事。於吾英所前費之財。必有所復。而所以贍養勞民之資。方將得此而不賈。故英今者。易以金銀。於其母財爲無所加少。亦猶向者之用菸葉。一經交易。其母財常以之加多也。蓋產之出此而入彼也。皆以其物在彼之求者。過於在此。故其回貨之所供者。亦常優於所出之土貨。所出者在此。賤而入彼。貴所入者亦

在彼約而及此奢。其爲物不殊。一遷地而其價皆長。此交易之所以利民也。譬如菸葉。其在之英值。設不過十萬鎊。以易法酒。至英價十一萬鎊。是以此交易。進者萬鎊也。今以十萬鎊金錢購酒於法。及其至英。值十一萬。則以此交易。英財之進亦萬鎊也。菸葉與金。固何較乎。又如一商。其窖中藏酒值金十一萬。以比他商屯菸葉值金十萬者。相形爲富。則以比他商。窖中儲金十萬者。相形亦爲富。其稱富者。以是十一萬之酒。而其所鼓之物力。所飼之勞民。其權力皆大於後二家之十萬者故也。金與菸葉。又何較焉。今夫一國之母財。積衆母財而成者也。通國母財所能贍之民力。視衆母所各贍者幾何。然則有前者之交易。其國之母財進。因而勤勞致產之民功亦進。生之者衆。此國富之所以日增也。非不知使英與法之易也。若以其所產之刀劍。鐵冶。蠶絲之屬。而不以其所不產之菸葉與金。英之利將更厚。徑者之通商。其賢於紆者之所爲。非一事矣。而獨謂用他產之爲紆。則斷乎其不可也。國雖不產二金。用以通商。不虞其竭。猶國之不產菸葉。用以通商者之不虞其竭也。吾力有以致菸葉。

者則菸葉自至故吾力有以致二金者彼二金亦自來二金與百貨同耳何爲而獨憂乏絕乎

或曰法酒國也而吾英工國也以工國而與酒國通猶梓匠冶人而與設壇懸望者爲緣其害將不止於失利而已應之曰工人游於酒家未見其失利也使民群之中酒不可廢則業釀者固分功之一民工酤於肆其費固廉於自釀自漉也苟執其不節者而罪之則饒者或過於肉而婦飾者或過於衣以是而鬻屠者與執鍼之徒因彼所不受也夫懋遷之事固當爲其大通而不可豫其將害而窒之況工人酒肆之喻其見諸小民之一二家者其理固不可通於二國乎一國之民想於酒德者固有之然爲數常不敵其不酒者且議者之意將謂民之滿酤由於酒賤乎則真不察諸實事者矣出酒而酤賤之地其民常惺惺也觀於義大里西班牙與夫法蘭西之南境可以見矣故民之嗜飲者必酒珍酤貴之地歐洲北諸國及非洲之幾尼亞皆不出酒者也往嘗見法北部兵初至南境以得習嘗則多酒失半歲數月以往其於酒



澹然與土人之造酒者相若。故吾以爲欲救吾民之酒失者。不若減酒酤之稅。而大徠之。其始未必不稍縱。而後將澹然者。殆可決也。且吾英今者酒權之所爲。非使民勿爲酒困也。乃困之使不得廉美之酤耳。酒之入英也。由波陀嗎爾者。則平稅以納之。由法蘭西者。則重權以拒之。問何由然。則曰彼波陀嗎爾與我好也。吾之所產彼實通之。其銷吾產也。勝於法。酒雖惡吾納之者。聊相報耳。噫。此委巷坐列買豎之所爲。吾不意大國堂堂。乃守其言爲科律。而用之以謀財政也。大商鉅賈。無母計贏。所擇而收者。知貨美價廉而已。未聞其以是爲報施之事也。而孰意今之登政樞而議國計者。智乃出商賈下乎。

惟其不知大道。而其見與委巷坐列者儔。是以商戰熾然。而以己利爲人害人利爲已害也。彼以謂使國不求有利。則亦已矣。苟求有利。非致損於他邦。固不可也。欲爲富乎。盡力以使餘國之貧。斯吾富矣。故各國之通商也。見所與通者之亨。輒目媚而心伎之曰。彼之厚。必我之薄也。終不悟懋遷之事。既爲斯民之所不可無。則大道爲

公其行之國與國也。猶夫其行之於家與家。所以大相生相養之局。而使世大和。非所以媒孽惡心。而轉以啓爭而叢怨也。夫吾歐世局。其可以致雍熙而享隆平之日久矣。所以不能者。上有君公將相以侈心。下有工商賈旅之爲伎。以沮力而言之。其下之所爲。固不減乎其上也。今夫民上之無義恣睢。不公好暴。所由來久遠。觀今日之民德與人事。欲冀其有轉移之術。殆難。願工商賈旅。斷專利之深私。以法匡之。雖不可以即變。要使彼之所爲。害止其身。而無及於世局。尙庶幾乎其可望已。

凡一國沮抑外輸之事。其端必起於罔利之賤丈夫。倡其說而揚其波。始見於談議之間。後乃及於政令之際。造其說者既點。信其說者遂愚。夫民之用物。取於最廉。誠天性之自然。亦商民之公利。斷未有舍賤而求貴者。此至淺之理。無待證辨而儼然可知者也。故人心之偏。乃爲專利者邪說之所蠱惑。蓋專利者之利。無往而不與斯民公利相背而馳也。市鎮之儲作。必拒外來。使轉移之事。非地著莫展。一國之工賈。亦沮外貨。令生熟之產。非土業莫銷。無他。皆以見伎失業爲慮耳。由此而外商所運。

重權繁興。由此而熟貨之來。且加禁絕。由此而進出之差。動指爲負。而通功易事之局。隨地皆荆棘矣。

不知鄰境侈富。其在我爲害者。惟於縱橫擄伐之事。則或然耳。至於通商鄰之厚。正吾之利也。蓋時方征伐。強鄰以其多財。海陸之軍。可以厚集。以爲吾困。而至平時。則惟其饒衍。而後與我相易者能多。我所有餘。在彼乃得善價。我所轉運。在彼乃可廣銷。未有舍富厚而反從貧乏者也。民以多財興業。誠爲同術。遂利者之所深妨。其於他人固無害也。且豈徒無害而已。生計之善。於彼乎資之。就令彼同業者。跌市相傾。於餘業亦爲公利。而惟其相病而競立也。而後物價之大公者出。造貨之失常寡。而用貨之民常多。則物價能平。夫固衆民之利也。私家之子。薄有積貯。而欲憑此以致千萬之資者。必之五都之市。四方商賈所輻湊者。未聞轉徙窮僻爲得計也。蓋彼知其地所流通者狹。則贏得者難。惟其所鼓舞興作者多。而後所幸而可邀之利業也。此乃富智者所與知。一人十人二十人之爲計如此。萬人億人京垓人之爲計亦如

此一國之民常當以鄰封之隱賑爲助我生財之資不宜反因之而興忌嫉之意也  
國有懋遷介於富厚動力之商國者其致富自易附之以倖野貧陋之夷狄者其興  
發自難此所以古之埃及今之支那其致富之業皆內生而非由外鑠二國皆尙農  
功而支那則尤以商賈爲汗處設爲法令重困辱之與人獄訟希得直者其賤簡商  
業如是嗟乎如吾商今日之用心辜權專利常以損人爲益已者其遭賤簡非不幸  
也惟商者之用心如此此英法二邦之商務所以交困而不興使二國者去其相惡  
之褊心與夫賤商之鄙吝各取其本國之財政通計而利圖之將見英之所可收於  
法者其利恆比他所之商業爲多而無往不復法之所可得於吾英者亦如此今夫  
法者吾英最爲密邇之鄰國也英之南部與法之北涯商船往還歲四五六復猶內  
地然故母財用於其間其所鼓舞之民功所贍給之民力較同母而用諸他商業者  
亦四五六倍即至遠所如英北法南歲亦一復則較之他所之商又未嘗遜也是以  
英與法通其利以比英之自與其屬之北美通以時計之已三倍不啻英美往還動

三四歲而走海者謂爲大利存焉則英法之事可想見爾法之民數極略計之不下二十四兆而美之客籍不及三兆雖法爲舊國民貧富不均其中多赤貧窮乏之戶顧其富厚過美實遠由此計之法之銷場八倍於美又以往返之數其商利方美殆二十四倍有餘矣而商之果通英固不能獨利也以英之庶富而近法則其利法殆與彼之利我者相方夫兩國爲通其利如此其利之過於他所通商灼然可計又如此而兩國主計操柄之人必出死力以遏自然交益之利源者吾誠不知其所謂也兩國皆庶富而近其利於交通在此其難於交通亦在此蓋僅隔一水爲隣國此之富強必爲彼之所疑忌一也其國皆富其民皆庶而動其求利也競而不相下而常以入之勝已爲憂二也商賈之鄙吝既中之矣而敵國相仇之私尤著其心本而不可化故凡所以爲交通之利者適以爲其相睦之難加以逐利之家倡爲邪說深信不疑以爲縱其往來則進出之差必負進出之差既負將國之敗亡隨之大聲疾呼一唱萬和方以不助其說者之爲喪心病狂也

凡歐洲通商諸邦其進出差互有正負但使爲負則商宗計學家莫不豫策其貧弱  
危詞聳論信者至多禁令煩興旅塗荆棘卒之數十年其說無一驗者而邦國城市  
關門閉他者其民轉以彌富用商宗之說而富者蓋未有聞也今者吾歐大小國邑  
之間其實用大通商法者固少矣邑猶有之國無聞焉荷蘭於諸國爲最通而其去  
真通尙遠顧吾聞其國之富厚百姓之驕虞皆得諸通商之利者也通商進出之差  
其情性根源與吾書發凡所謂歲費歲殖相待之率大異而必不可同歲費歲殖相  
待之率名費殖差殖過費則爲正不及費爲負正者其國日富負者其國日貧蓋國  
猶家然其歲殖優於所歲費者必綽然有餘而積蓄日厚其歲殖劣於所歲費者有  
積蓄必日侵削無積蓄必債通日多夫使國之歲殖不逮所費則民間之財日薄  
而無以爲贍功興事之資其國之日即貧弱宜矣故曰費殖差不可負也而昧者乃  
與進出差等而視之進出之差必待通商而後見至於費殖之差雖無通商而爲獨  
立之國者猶有正負之異也故費殖之差可合全地而爲計蓋全地之內其中之富

庶與凡民生之事必有進境退行之異則其費殖差亦必有正負之可言

且一國之內其費殖差雖正而其通商之進出差仍負可也半稊之中其國所出口之貨常較所進口者爲不及金銀之至自遠方者皆不久而更出其制幣消磨日削而各種楮幣出而代行甚至所稱資於鄰國者債通日增其外若退行如此然其國之實力真財其地利民力之所歲登者日進而有餘試觀北美新稱富近日戰事未起之初（此篇作於一千七百七十五年蓋自立之戰初起時也）其中商務所與英倫交通之情形則知前說之見諸實境不待深辨而自明矣

#### 篇四

#### 論掣還稅

國之工商禁錮外產之入關既掣斷本國之銷場市利矣其心猶以爲未足則又觀外國之廣售外國之市非本國之力之所能制也雖欲爲之掣斷不能於是降心以求請於貨離本國之時有所縱貸以爲勸其縱貸之事不一惟掣還一政若最善者

掣還者。凡國中土物登市。既征之矣。設其物裏以出口。國家於前征者。掣其全抑其分以還之。此其所以勸民資利於外也。顧如是而勸往者。其貨之出國。不能方之未稅者而加多也。蓋工商之業。一國財之所向注。孰多孰寡。本於地勢民才之自然。自國家徵取輕重輒殊。而自然之局以變。縱而弗取者。不過復其所本然者而已。民之所重者。不能使之輕。母財之所遠者。不能使之忽就也。故勸商縱貨之政。不過守一國商局之固然。非能益所本無而廣自然之利也。

案掣還稅之政。英國行之已久。自弼德相英令各口立屯棧。以寄頓應征而出入未定之貨。其政遂罷。蓋先已盡征。而後以外輪掣還。於政爲瑣。屯棧設則貨離棧。將銷而後稅。便於商而於國無所損。聞其政發於衛爾波勒。爲倫敦商所抗。不果行至弼德相而後行之。然其議亦采於本書也。

其於本國物產如是。其於外入復出之貨亦然。英之關稅。於外貨入口一項。所征爲至多。助餉條例第二條云。凡外貨更運出口者。無論運者爲英商爲外商。皆許掣還。



原稅之半其限期英商一年外商九月在限內出口者皆許掣還若酒若葡萄乾若諸種絲貨所豁免者尤優其期限至若耳治第一且展爲三年云

浸假而正權之外又加雜征惟更出時則許全掣其大法如此而比較例多於是掣還一事遂不若初行之簡易即如外貨出口時商告前所運入者實過所估內銷之數甚遠意主外輸則全稅可以盡掣北美屬地未辟時馬理蘭泊威占尼亞菸葉皆英商運之歲至者約九萬六千莖首而內銷者一萬四千國家欲菸英之無滯則許將雜征助餉全行掣還惟責無踰三年之限而已他若西印諸島餉亦英商所專運者入口後不及一年出者全掣不及三年出者亦全掣而留助餉舊征之半留助餉之半者菸葉而外諸貨大抵然矣餉之入英亦過內銷之額甚遠而掣還之例二物乃異足見其多所抵牾矣

凡商競最深之貨已禁其內銷矣設明言致之以更出外售則納關權入屯棧以待及外出舊稅無掣還者蓋商競既深雖明知其致以外售而國中同業者若惟恐其

竊入市廛。以與土貨爲競。雖困之以屯。猶未足也。故析其掣還如此。此項外貨最著者。如各種絲貨。法產之紗布印花棉布等是已。

商逐利資。故常法捐而不問貨爲何國之產。獨英之於法不然。雖有厚利。常絕不爲彼以爲爲敵轉輸。使有商利者乃大損也。故凡法產入國更出者。於新舊之助餉雜征。皆不掣還。

助餉條例第四款。凡運酒出國者。無論內外產。所掣還原稅。多過半不止。意當時議令諸公。似欲勸民樂趨此等捐業者。助餉之外。尙有雜征。如所謂續稅新助餉。三分之一及三分二等新餉。一千六百九十二年之攤征鑄錢新稅等。遇出口皆掣之。其運酒而外輸如是。然有難者。前各種征收。續舍稅及攤征二者。皆於入口責見錢先繳。其積款既鉅。其子錢自多。民不堪命。故雖有掣還。而操轉販外酒之業者。仍寥寥也。況自十八稔中葉以還。酒之雜征日多。而許其掣還者漸少。則無一噸之酒非關出者。固其宜矣。

一詞書院自  
察理第二之十五年有勸商之令。界英商以專運歐貨銷美之利權。酒自在專運列  
矣。然美洲海岸縣遠。難於稽察。而其中客籍民。又例許自置舟船。以運不徵之土貨。  
售於外邦。彼不能實往而虛歸也。則違例而載歐貨入口。然惟販酒獨難。蓋既不能  
販諸產酒之國。而由英轉販。則極重之稅。臨出不許。掣還其業無利。獨麥地拉島所  
出酒。以地非歐屬。不在禁例。則爭運販之。以入北美西印諸海步。麥地拉之爲名酒。  
自此始。食久而民嗜之。始猶行屬國間。一千七百五十餘年。大陸戰事起。英民亦多  
飲之者。至一千七百六十三年。兵罷。英王若耳治第三著令。凡酒稅除法產者例不  
掣還外。其他處餘產。凡更出以售屬國者。皆許掣還舊稅。所仍納者。惟三鎊半稅云。  
俄而北美有自立之事。

此令之施。若優於所屬而薄於他國者。然所貨者惟酒與二三他貨已耳。至於餘產。  
則待所屬薄而他國轉優。蓋餘產出售他國。尙許掣還助餉之半。而此令則云。凡歐  
洲及印度貨。販售北美諸屬者。助餉之稅勿掣。掣者獨酒（法產不在此例）白棉

布輕紗。

考掣還之政所由昉。大旨在勸捐商。而國家之所以樂勸捐商者。意以謂外商貨載。悉與見銀。故此業於國爲尤利。夫國之所實。既非見銀。捐商何須獨重。故掣還之設。其用意未免於愚。顧其旨雖愚。而其政則初無可訾。蓋掣還政行。非能變商務本然之局。使母財所注。因此而畸有重輕。特有之而復其本然。使向爲重征苛賦而梗者。可以免耳。夫本然者無過。以征賦之重而避趨生。掣還者。掣已征之稅而還之也。僅以救過。未嘗有功。故捐商者或無所利。而蒙獎勵。亦無所害。而被抑摧。今使國有母財。用之於農則已多。用之於工而亦贅。以爲國中貿易不可。以爲中外貿易亦不宜。夫而後乃爲境外貿易之稍業。民之趨利。不讓豪釐。既已爲之。必有宜利。夫奈何而抑之。又焉用其勸之。

案掣還雖云復其本然。無所損益。然已征之矣。後乃還之。民之所失實多。奚得言無損耶。子錢。一也。費時。二也。失事。三也。且行諸官邸之國中。飽之弊。由此而興。奚

得言無損耶。征權者之事，往往上無所取於民，而民之所失甚厚。居上者慎無曰：吾無所取於民，遂煩然出號而施令也。

還其半而留其半，於國之賦稅固無傷也。今使賦者全而留之，則始也所已入之外貨，以稅之重將不得出，終也外產之貨視已成事，將莫肯來。然則國將並其所留之半而亡之，奚翅去半而已。知此則知掣還半稅於國爲無所失矣。進而言之，雖掣還全稅於國亦無所失也。蓋使取本國與外國之產所征之稅，當其出口全掣而還之，則內稅將少損，而關權將大損，其損固也。而還顧國中向以煩賦使勞民之力，不得由其自然，通功易事，散利相養之局，不得極其量者，至是而皆復焉。其所得顧不大耶。

案斯密氏此言，最窺財政深處，非高識遠量之士未易與此也。英五十年來，於賦稅之事，幾於悉貸與民，而僅留其舉犖數大者，而後來之入倍蓰於前。蓋財者民力之所出，欲其力所出之至多，必使廓然自由，悉絕束縛拘滯而後可。國家每一

寬貸民力即一恢復而其致力之宜則自與其所遭之外境相劑如是之民其出賦之力最裕有非常識所可測度者若主計者用其私智於一業欲有所豐佐於一業欲有所沮撓其效常終於糾弊不僅無益而已蓋法術未有不侵民力之自由者民力之自由既侵其收成自狹收成狹少取且以爲虐況多取乎惜乎吾不能起荊公輩於九原一與之深論斯事也千古相臣知財計爲國之大命而有意於理財養民者荊公一人而已其法雖病然事難動寡使然而其用意固爲千古之大慮不容後人輕易排擊也

雖然吾所謂於國無所失者蓋指運往自主列國之貨而言非謂運往北美英屬吾之工商在彼有專市之利者蓋既有專市之利則彼之去貨雖稅自若不以掣還之故而加多又不以掣還之故而加少也掣還不以加多則掣還之稅於國爲實損故掣還之政必用之於真售外邦之貨物不宜用之於屬國之通商尤不宜用之於復還本國之諸貨如吾國菸葉商務之弊往往有此徒使罔利售欺既有損於公稅又

使平稱奉法之民。陰受其侵奪。此固通國所共知。不可不遏絕者矣。本國與所屬者。通商貨之出口者。其稅當如何而後可以勸商。而不使之於衆民應出之稅有所略輕。吾當於論稅時析之。

篇五

論獎外輪

吾英諸貨外輪。民常謁有司乞獎助。宜與否。有司決之。此其意以謂英產外出。他國之產。常與爭銷。民獲官獎。則其貨可以跌價爭售。而無虞折閱。如是。產之出國者日多。進出之差。不至爲負。則國之大利也。國家之權力。既不能使其民專外國之市利。如本國然。又不能強外國之民。使之必銷英貨。如英民之所爲。則以謂其次莫若以利啗之。使樂市吾貨。夫貨折閱以售之。固無異於以利啗購者矣。商宗計家。其謀爲富國之道如此。彼固謂但使進出差之無負。則吾儕小人之囊橐。不久將悉盈也。或曰。獎有宜給。有不宜給。凡其貨出國交易。非得獎則必折閱者。獎之當也。至他物

之價既足以復其本矣。又兼獲通行之贏率。雖不獎。無害也。蓋價足復本而猶有贏。則其與外產平競可知。平競則無俟於獎。故獎必施諸價不及本抑及本矣。而無所贏有時且折者。獎所以救折者也。知其必折於外。故先受獎於內。以爲之地焉。必獎之而後其業可以興。可以繼。至於每一交易。國之母財。以之坐減。則彼所未嘗計也。誠使諸商皆然。國之積貲。陵夷盡矣。

夫其貨必待獎而後可以外輸。則如是之交易。其於國常無利而有損明矣。然必獎之使可久者。以謂不如是。國貨不出也。而不知使莫之獎。彼之用母與業者。將更求其能復本而有贏者而爲之。斷無止於折閤而不變者也。止於折閤而不變者。有之。自獎政始。將以求富。適以貧之。善極獎政之效。行使通國之民。昧於利市之業。而常爲折閤之商已耳。未獎則所折在商。既獎則所折在國。言計如是。吾未如之何也已矣。

近者有人著爲小書。流行都邑。其大旨以謂自穀麥出口之獎政行。出口之麥。以價



銀言過於進口之麥甚遠其所過之數以抵國家所給之獎費有餘則以此爲獎助  
外輸利國之明證夫自商宗之說觀之其言固以甚辨蓋獎麥外輸公家之費雖甚  
鉅而進出差額之反正所得之利過於所糜其說之善聽以此獨不悟彼所謂非常  
鉅費而用於獎者尙爲最小者耳而農民母本所用以築田生穀者方此尤多不可  
置之弗論也果其有利其麥之至外邦所售之價復者豈僅獎銀且必有以復農本  
而加之以通率之贏利而後可使其劣是則一國之民舉受其損而國財且以坐耗  
此理灼然非巧言飾說所得遁也不幸持商宗之說者乃即以其價之劣此以爲獎  
政所宜施此所以無往而不左也

案斯密氏既斥商宗之語以徒積金銀爲非矣獎輸之法自無攸當今姑以商宗  
之說爲不誣而金銀實爲國家之重寶又使物產在外其價昂於國中則獎輸之  
爲未盡無謂也何則彼所求者但務廣推外銷而差末負之積黃白而已雖然彼  
求積黃白黃白則既積矣吾姑備當時設爲此政之尙有不平者乃有地食租之

家恐租率之日微利在穀麥之多出口。又知獎費出於大藏。乃通國所共任者。費公帑以保私利。則無怪其力持之矣。願穀以獎而出國。國中餘糧之價。常貴而不跌。非食麥者之利也。是齊民共出其財。以使國儲之常少。糧價之恆高。此更何說耶。故觀此知當乾嘉之際。英倫民智之高下。與擁地自封者勢力之大小也。

而事有越於常慮者。自獎輸政行。穀之出口日多。而國中之麥價。不見貴反益賤。於是主前政者愈持之。以爲獎輸利國之明驗。夫吾英穀價降賤。始於前祺之末。蘇延於本祺六十四稔之中。誠有目所共睹。然此可謂吾英穀麥以天人之交相。雖獎外輸而猶賤。必不得曰吾英穀麥。緣獎外輸而益賤也。使穀緣外輸而益賤。則反是而觀。將緣禁出而滋貴乎。殆不然矣。法於穀麥。禁出之國也。一法禁出穀麥之令。至一千七百六十四年始除。一其中麥賤。與英正同。則知麥賤與獎出爲無涉矣。吾意穀價之降賤。全非政令之所爲。而其故或由入本祺來銀值之漸貴。銀穀相權。銀見少則穀見多。號曰穀賤。殆由此歟。至謂以有獎輸而糶乃愈平。則斷斷乎無此說也。

案斯密氏以十八稔英國穀賤爲銀貴之反驗。後之計家皆疑其說。以謂當時銀入歐市者未嘗加少。而各國皆漸用金。法銀當尤賤。無緣更貴也。考穀價所以降賤之故。正由農學日講。田事日闢耳。民知輪種雜糧。如薯蕷。蹲貳之屬。以蘇地方。而曠田制廢。又得播種新術。試考其時報。紙告白所銜售各項子種。可以知之。又田功進矣。而天時佑相。歷歲大穰。民力益裕。故當日歐西戶口大蕃。其見諸英倫者。如南部當十七稔之終。戶口僅五百萬強。至十八稔中葉。乃倍前數弱千萬焉。且其效不徒穀賤而已。田租亦大起。有地田主。人人素封矣。合之數者而觀之。如穀賤。如租高。如庸進。如戶口自倍。其民生大進如是。殆非僅僅銀值增貴之所能爲。而治本於農。非野業之修。莫能致也。

歲中穰則糴平。歲大穰則糴賤。顧以有外輸之獎。歲愈穰則出者愈多。而糴無由降。夫不使糴過賤。以病農者。固設爲獎政者之本旨也。至於歉歲。雖獎出。令停。然以穰歲之多出也。蓋藏空虛。無以相補。故歲無論穰歉。是獎外輸之政。皆所以使國中穀

價昂於自然之平價。

夫謂農政以有獎出而糧貴此不必甚智而後知之乃議者以謂獎外輸所以豐佐農業者其理有二獎出則外銷者廣銷廣求多供者自奮一也獎出則內銷者狹銷狹價昂供者又奮二也以是二因故使獎出之政多歷年所其生穀之效將過於不獎出者之農而穀以多而價平其所以抵獎出之所費者尙有餘也。

應之曰所謂因獎出而外銷廣者無論所廣之如何外盈者必內虛非奪其內銷者無從有也夫每括打之麥其以獎而出者固將以不獎而留留則所以供內者自舒而其價亦比例而將跌故凡獎外輸者無間民食抑他產也與加賦於民其效均者有二所獎之費本出於民一也外輸穀少其糶必貴二也夫穀者民所必資其損必徧於國中故二征相衡後者尤重請以實數言之假如歲中每括打麥出口者其獎費爲五先令而國中麥價緣是貴者每布歇洛爲六便士以八布歇洛爲一括打則是與每括打費四先令等矣所舉之數不多如此然而民於每括打麥之外輸也既

分出其五先令矣。而於其所食之餘糧，每括打尙增多其四先令者，吾聞主其說者之告人曰：每歲外輸之麥，以比國中所留銷，其率猶一之於三十一也。然則通國之民，於前征凡出五先令者，於後征則出六鎊四先令也。（四先令以三十一乘之）今每歲所獎而出者，吾不知幾何，徒以此例計之，則其征之重爲何如矣！且賦稅不能徒行也，固必有其承而出之者，而民生之舒蹙殊焉。今於民生之最重者，無異加之厚征如此，則其效將見於勞民生事之不供，或見於民力庸率之加大。夫而後前之二征有所出也。由前而言，將小民之力屈，力屈則減其事畜教養之資，而國不以加庶矣。由後而言，將富民之業侵，業侵則損其役財贍功之事，而國無由加富矣。是故獎穀外輸，而使出者無量，不僅奪其內銷者以爲外市也。且使多歷年所而爲之，其勢將以彫戶口，乏民財，而傷其本。本傷則內銷外市之數將俱微，而生穀之量又烏從進乎？

所謂因獎出而內銷減，穀價以昂，農蓄穀多者，使由外輸獎政，而穀之真值以昂，抑

能使多寡相同之穀。所養之手指加多。而其所爲養之事。或奢或儉。或適中。一如同時國中他人之養備者。則謂農由此加奮可也。顧此不獨非獎外輸者之所能爲。國無政焉。足以致之。故由有外輸而穀價昂者。名昂而非實昂也。名昂爲能使農奮乎。前所指之二稅。陰行國中。於通國之民。有不便之實。而所謂惠農者。則名存而實亡。未見穀之能加多也。

獎外輸之實效。於穀之真值無所加。而於銀之真值有大減。同此銀也。未行獎政之前。所易之穀貨多。既行獎政之後。所易之穀貨少。蓋國中百產。成於民力。民力待穀以爲養。穀既貴矣。百產準之而皆騰。百產之價皆騰。銀之真值斯大損矣。其見諸力庸之率者。以勞民得財。本以贍其身家。其一日勤動之所得。必足以致一家之生事。而奢儉適中。則視其群事之進退中立也。其見諸各種生貨者。以樹畜之業。良楮雖殊。要皆與穀食爲比例。如芻蕘。如豚膳。如馬牛之價。如轉運之費。皆視穀價爲高下者也。力庸之率。生貨之價。既進矣。由是而物材之價進。由是而被巧成物工之所爲。

者亦進。然則一國之內。凡地利之所產。民功之所登。無一物焉不視穀價之高下爲騰跌矣。

案獎穀外輸。其勢可以使穀貴。穀既貴矣。他樹畜之產。因而轉賤者有之。不必盡貴也。蓋資生日艱。致穀之外。民無餘力。而銷市日隘。故也。英國麴麴賤。則肉貴。麴麴貴。則肉賤。蓋由此也。故獎政既使通國受貴穀之損矣。而於農又無益也。

是故由獎外輸。農之糶穀。雖昔之每括打三先令六便士者。今乃四先令。而以穀價之加昂。山主之徵租。亦方之在昔。爲有進。然以百產之比例。皆賤。今之四先令。其爲用無加於昔之三先令有半者。則名雖爲進。而農與田主之歲入。實不能由此而加。優也。農不能加。毋以力田。田主亦不能加。豐於自奉。惟至購用異方之貨。或以之而見優。而購用土貨。則無毫髮之益也。農人所資。盡爲土貨。田主所用。亦土貨。九而外貨一。則穀糶之昂。於彼均無攸利。明矣。

夫銀值之降賤。亦多因矣。使其山礦產之肥且多。則其效見於交通各國者必溥而

公故其時百物之價各各漸騰雖名得者必不以之加饒以謂有損則不可也。梧槽器飾之屬其他日廉而物價在市者比例互觀固亦無殊於鑿背獨至銀值降賤由於一國之政所自爲者則其效獨見於國中一越關門即不如此故其事與前大異不獨不使民富實則將使國貧蓋百產價昂獨見本國民之致物備用以難百工之業皆形蕭索而鄰敵所產得以跌廉競市將不獨侵其外銷總且奪其內市其害有不可勝言者矣。

案後之計學家則謂銀值定於時勢之自然決非爲政者所能高下設其能之必其國孤立寰中與各國不相往來而後可外此皆不能也既不能使銀值降賤即不能使物價低賤明矣然而政於銀值雖不能爲高下而以擾民使不得安生樂業有餘故政煩者其口之歲殖必退也。獎外輸之害國在其擾民而不在其使銀值降賤也。

波陀噶爾西班牙一國以地勢鄰近南美遂奄有其地諸礦而金銀之散於歐洲諸



國者大抵由波西故金銀在他國貴而在波西賤者由於自然雖然有珍其所差者不外運費保險間耳以二金之貴重而易挾則其運費本微至於保險則以其物之價值爲比例故二品之在波西使非以政爲之則其價值雖較他國爲微必不至如今者相去之多以病國也

金銀之出口也在西班牙則明禁之在波陀噶爾則略重出口之權其效與明禁同故有外流皆盜關出之物關出之爲費必重於是二者之在他國與其物之在波西其本值乃迥異矣其事如泄水然截流設堰諸以爲池洎其既滿漫而橫溢與無堰同夫明禁重稅取也金銀水也池之諸水有限國之受金銀有極二邦地利民力之所登者幾何所計以通功易事有待於通財之輪轉者奚若爲制幣爲積棧爲領贖爲驅飾至矣盡矣不復加矣過此而多雖有厲禁不能不越堰而爲橫溢之流者勢也吾聞二國每年所關出之金銀與其所徵入者差相等可以見矣且川堰內之水必深於堰外堰愈高愈固堰內外水之深淺愈懸故金銀之在國也亦以

禁令之故。與其物產比例見多。其權愈重。其罰愈深。其禁伺愈密。其比例見多。亦溢甚。是故入其國者。徒見黃白之充。稠用於格格器飾者。幾若他所之銅錫。而宮室餘物之華飾。又粗陋不足以稱之。蓋金銀太賤。而餘產昂騰。農工諸業。興作不易。轉使外國生熟諸貨。得以低價入市爭售。而其民大困。波西以禁出多藏。而錢各國以罕至。難得而貴。一揚一抑之間。外產與之爭銷尤易。使一旦開關放流。轉瞬之間。內外水平。行將相若。第當金銀流出之時。淺人必將以其事爲大損。而其實則轉無用之金銀。爲有用之物產。國中物價。日即廉平。後之少者。與前之多者。其於用乃正等耳。夫金銀之出國。非徒然也。勢必有所與易。所易有饒有需。而民知顧利。需者必多於饒。若物財。若器資。若糧食。三者既足。而生財之業殷然。是故放金銀之出國也。乃轉滯財以爲生生之母本。而勸功享實之效。因之而收。其茂殖必以立增。數歲之後。且以大進。何至多金而貧。如今日之事乎。聞人有被禍懷珠而苦凍餒之患者。波西二國以之矣。

案斯密氏既言金銀出國非法令所能禁而波西每歲開出之數與徵入者差等矣可知波西之民所以病者不必盡由此禁也其禁固非而國祿則不必由此當是時二國之民群然以掘礦積金爲事而農工商賈諸正業多鄙棄爲不足爲又以政法日非守舊宗禁新法設違問之官以遏絕異端新學民桎梏相望救死不給尙何生業之能爲哉且其俗所貴尙者首神甫次武人而以治生遂利爲汙處故二國之不振者政教之非不僅財政不中已也十九稔以還舊習稍改政公而民行其國勢亦以漸起而至今猶不足與英德諸邦抗列者則民智之猶下也波西於金銀則禁其出國吾英於穀麥則獎之外輸雖爲事不同其於言計之謬則一其有害於人國亦均蓋無論吾國土田之肥磽農事之巧拙獎出之效皆使穀之在國者貴在外者廉又以穀價爲百貨之所程也故國中之銀易權日遜而外國之銀相形以昂吾既以賤麥餉遠人而又使吾民食貴穀吾工成物雖欲爲廉勢不可也則荷蘭之工乃得跌貨價以奪吾市是獎政行而外人獲倍稱之利也

國中穀貴固也。然其貴在名而不在實。穀之斗斛均。則其食功相若。不能多也。多者從其所易之銀價耳。徒使役財食功之家因之而費。而於農人田主又無利也。彼農人田主之所見收。苟以銀言。誠亦覺其多取。而周淺之衆。方謂獎政於彼。誠有利也。獨不思得銀雖多。而食功儲糧置物。凡本國之所產者。皆比例而加貴。所獲一而所失者三。以此爲利。猶稱飽於夢食耳。

然則獎出之政。利者獨販麥之商耳。歲穰則以獎之。故而麥之出國者必多。蓋歲既寡。無以通於凶年。歲歉。其人國者又衆。業廣而價常高。倍稱之息。舉焉。向使國家一任其自然。販者之利。烏從得乎。持獎外輸之議。而常願其勿罷者。無怪乎多此商也。田主農人之議穀法也。於外至之穀。則抑之以重權。於出國之產。則勸之以獎輸。大抵見工業之所爲而尤效之耳。彼以爲一禁其入。則可以專內銷之市。一獎其出。則無至於貨壅而滯銷也。工既爲此而利矣。農何爲獨不然。而彼未審乎穀與百貨之異也。夫禁入獎出之政。施於蠶繭麻桑之功。而其價以起。此其貴者。將獨名貴。實亦

貴也其取功易食之量以多其贏得實以饒其歲入實以廣其居養將由此而加優其興發將由此而加大故二者之政施於何工其業皆有盛旺之效而民趨之者多也獨施於農則不然徒爲其名而亡其實農人之歲殖不以加多田主之名租不以加厚田野之業不以盛旺也何則所養所雇之口手數同乎前而不能增也蓋稼穡者民生所必資百產準之以定價故百貨惟穀不能以易銀之多少而或變其真值也獎其出禁其入其值不以之增廓然大通其值不爲之減持一斗之粟行夫五洲其所養之功力一也懸夫百年其所養之功力又一也蠶則麻桑非百產所準以定價者也以穀麥貴賤金銀可也以金銀貴賤穀麥不能也

案國家政令施諸稼穡尤不可不審者百產可用可不用民尙有所避就至於五穀則無可避就無所增損使歲饑而禁外至之糧其害豈禁他貨者所可方擬也耶

獎外輸之政微論施於何產皆有一弊隨之其一乃兩宗諸政之所歸大抵使民棄

利厚之產而從利薄之功其一則獎政之所獨使民之治生不僅從其利薄且從其失利者蓋其業必待獎而後立未有不爲失利之業也至於施之稼穡其弊尤深勸功發業之效日以遠矣田主之責獎於國也雖尤效工商逐末者之所爲而於二家所以責獎之故則未曉然也待廢度支待增國稅而於其產之真值則未嘗有聚髮之加且以銀值降賤之故百物市價日昂農民退怯而耕耘浚治之功亦因之而鹵莽蓋田業與通國之民功未有不相待者也

獎政加於外輸矣而亦施之於內銷之產或有謂其勸民功徑於外輸之獎者前論外輸之效等於加稅者二端而獎內銷之產者國賦所加止於獎費其物之價不緣此而賤且以產之日多而跌故民之所失於獎費者通而言之亦收之於減價也顧此類之獎希有行者蓋商宗之學以多收金銀爲富國內產雖以獎而進金銀則未嘗由之而多也故其獎之也不若外輸之亟或謂求獎內產多譸張之民此吾所不敢知者求獎外輸其譸張乃尤著也何必於內產者而獨苛乎內產之獎物以獎而

日多供過乎求。不爲工商之所利。獎外輸者。其事反此。此其重彼輕。此之實因也。吾嘗見製造之家。其貨之難通。嘗合力出獎。以勸外輸。其獎雖重。則取償於後之貴價。合前說而觀之。則知獎政施於民業。大抵矯物情之自然。於人國爲無益。然而國於天地。有鄰敵之相轄也。則自固其圉。要不可廢。故產爲守禦所必資者。獎以勸功。使自爲之。而不必常仰於鄰國。未無當也。其業非獎助不立。則雖加通國之稅。以輔翼之。無不可者。此如吾英海船所用之繩纜帆布。如本產之火藥。獎其外輸。或其內產。務使其業之日盛。皆可執此說而通之者也。

案中國自海通以來。咸同間中興諸公。頗存高瞻遠矚之概。天津江南之製造局。福州之船廠。其尤著也。顧爲之者一。而敗之者十。珍域之致嚴。侵蝕之時有。遂使事設三十餘年。無一實效之可指。至於今治戰守之具。猶靡無窮之國帑。以仰鼻息於西人事。可太息。無逾此者。

今天獎政者。乃用通國之公財。以維持一家一業之私利。以大公至正之道言之。未

有可稱爲善政者。顧國家當極盛之秋。府庫充盈。主計者茫然不知所措注。則費其一二以勸其所急之民業。未爲病也。國之濫費何限。奚於獎民一事。獨斤斤爲國之爲事。比於家。既有多財。不憂浪費。獨至度支吝細。國步日艱。而有人猶以此爲富國之規守而勿廢。斯大愚耳。

有時雖名爲獎。而實與舊稅掣還無以異者。故其損國亦與負獎有差。此如精鹽出口之獎。乃掣前征糖餉之稅而還之也。絲帛諸貨出口之獎。乃掣前征生絲蠶繭之稅而還之也。火藥出口之獎。乃掣前征硫磺硝石之稅而還之也。司權者必出入同物。方名掣還。質同形異。則名爲獎。而不知此雖獎而實非獎也。

國家於百工之藝事。賞其精能。施以獎政。此其效與前所指之獎商者大異。不可混也。蓋既稟稱事。所以勸工。有鼓舞民業之效。而無矯拂自然之憂。乃以使執其業者術進而益精。非以使其利權有偏重也。且獎藝之爲數常微。而獎商之爲數常大。吾英只於獎穀外輸一政。每年所費逾三十萬鎊之資。其餘可推校矣。是故獎商獎藝。



同名爲獎。且有時名獎。而實則擊還之稅。而吾嘗考一物之體用。究利害之所由。固當據其實而論之。不可徒發於其名也。

以下專論穀麥商務及英國穀法。

既論獎政。如右。願非取穀法而詳言之。則於義將有所漏而不賅。世之人於國家獎穀外輸之政。及餘政之相因而起者。翕然皆以爲良法美政。無異詞者。習非勝是。殆不可攻。雖然。使但取穀麥之商務而審其情實。則穀法善否之真。將自見也。事之所關者大。而俗之迷罔者深。吾雖欲避煩辭之說。有不可得者矣。

穀麥商務。向分四塗。是四者雖常爲一案。所兼。顧徑術不同。其事固離然四也。國內之商。一也。運穀入口。銷於國中。二也。運穀出口。輸於外邦。三也。而所謂捐商者。運穀入口。所以爲出。四也。

一則先取內地之商而論之。俗常謂穀商之利害。與食穀者之利害。必相妨而不可合。此大誤也。二者之利害。無所不同。即至甚饑之年。莫不如此。商之爲難也。價之貴

賤必與歲之豐歉相準而後其利收焉。不及而賤則害人。過而貴之則害已。此不通之驗也。蓋歲歉矣而後昂其糶。糶昂而食艱。食艱而通國之民皆節其口腹。謹其糞殯。富者猶苛也。窮者乃加甚。使彼昂其糶而過之。則食穀者節謹之爲亦比例而過。節謹而過。現存之穀將濟饑日而有餘。餘糧在邸而新穀既登。則彼所失亡者不僅天時之損也。可貴之儲轉而爲賤所亡彌多。故曰過則害已也。又使歲歉矣而彼之糶如故。抑昂之而不及。則食者節謹之事亦比例而不及。節謹而不及。現存之穀將既盡而猶饑。此不獨商失其所可收之厚利也。且使國人失其減損之猶足支而得羅損之尙不隳。流離困阨。瀕於死亡。故曰不及則害人也。夫視倉箱之所餘。度戶口之多寡。而節日月之糧。必令足支以待新穀之至者。中饑之民之大福也。而商者之利亦正在此。準豐歉之情。昂其糶而爲最大不可復多之價。而彼之厚利收矣。彼惟熟於年穀之情。視其民旬月之所待給者。以操縱騰跌於其間。而知其價相協之與否。此非精於其業者固不能也。雖然。彼之用心固以自適已事。以責最優之贏而已。

不必爲富而仁。於同國之民有厚愛也。願任其自己。而國民之受賜已多。且惟恐其計利之不悉。使害已者。馴至於害人焉。不親於海船主人之待其水手乎。舟行大海之中。糧水之儲有盡。而程途之遠不可期。則計口制節。粟其飲食。雖其事誠有時而過。爲無謂之周防。然而持之絕之災。以與減省者較。則不可同年而語矣。知此則穀商饑歲之所爲。亦可恕已。雖以彼實利之周。制穀價者。亦誠有時而過。然由此賴以全濟者多。使其徇廉惠之名。當甚歉而爲平糶。則其中之轉於溝壑者。無異彼之推而內之矣。至於實利通周。而貪情用者。其受害亦最深。不僅不仁之見。憤怨也。災過穀留而價跌。所欲求之利。轉以厚求而亡。及其悟之。固已晚矣。

案此亦全書中最美之一篇。爲前人所未發。而後人所稱誦者。羅哲斯曰。當饑之歲。穀商欲華豐歛之資。而制爲賤價。其事良難。僅能揣得其粗。加以保險之費。以爲價耳。故商欲考一時見穀之盈虛。而農人有穀之家。新不以告者。於農爲失計。於國爲有損。而所損者。又非生穀者之益也。蓋商已於價中酌加之以爲保險費。

矣。

今使一國所產之民食。彼爲穀商者。得聯爲公司商業。全舉而有之。則此公司者。效荷蘭椒桂公司北美菸葉公司之所爲。聚其所有餘過多者。而焚毀播棄之。務使供常劣求。於以貴高價可也。顧其勢不能。雖有其暴之君。極峻之法。不能爲如是之壟斷也。法既不能爲此。彼欲憑數家之多財。封聚之以罔市利。則將見百產之中。穀爲最難者。此不獨其產之至多。非數家之財力所能辦也。就令能之。而穀之生也。與他產絕殊。勢又不容其如此也。國非射獵游牧者。其所銷者必穀爲最多。而民力之存於殖穀者。亦方他產爲最廣。一稔登場。分其利而有之者。其數又最衆。此分利之人。其散布國中者。所居徧於山巔水涯。又最遠也。則不能若治他業者。其主之易呼以集。明矣。又其爲銷也。或徑致於其鄰里鄉黨。或售之於商轉以爲糶。國中之穀商麥賈。與夫農人餅師。類而計之。方之治他業之商賈。什伯不啻。其衆且多如是。則其爲聯愈難。惟其如是。故雖當饑歲凶年。而藏穀之家。知以時價售其穀。將未必盡也。則

常平其糴斷不令舊穀有餘新者已至而徒使同業之人收其利也一人之情如是衆人之情皆然未有不準豐歉之形以求其最多之利者

歲之饑饉也輕則曰歉重則曰荒今若取吾歐戰近二三百年之記載而考其荒歉之所由則將見歲之稱歉者大抵皆水旱隔并之所致有時師旅之後村落荆杞民皆乏食然而少矣至謂由群賈相聚擁穀貴價而然者則絕無之事也顧水旱天時之厄因之致歉則有餘因之致荒則不足荒饑之至類起於國家救歉之政其術不善轉以致之此數百來年吾歐前事所班班可考者也

案海饑之災歐少於亞以其地形破碎多江河便於轉漕故也自鐵軌既行饑乃絕無之事此今世之民所最優於古者也英大饑在元延祐二年間其時每括打麥價約今幣十二鎊有半此後則不少概見有之往往起於官禁屯聚或地私其極不相通餉則偏災以興二十年前愛爾蘭嘗大饑則以其民平日專食薯蕷而有甚爲災之故凡民食儉陋則其地易饑故西人以民俗精治膳羞廣羅蔬菜爲

禦荒上策而以俗安儉素食不重也。

非計使俗如是雖財賦豐積荒歉所不免

其國廣土宜田道塗利關而商賈通流無關稅之爲暴則雖至凶之年歉或有之荒無有也雖極劣之收使其民出之以謹節將皆足以粗給蓋歲之所以凶者不外旱乾水溢而已而國中之田高下互有偏災所害必損其一而留其一也獨至稻園收者必在下田且有時需水必其至足則旱魃爲虐或不勝耳然而災之徧於國中者少使商旅大通而國家政令不爲之梗則有無可通不必遂有餓殍也數歲之前印度孟加拉大旱此雖可致甚歉而猶不至於荒不幸當此之時大東公司中人輒突謬妄其救荒賑穀之令皆見近而不見遠於是大災赫然成矣

案印度凶荒多見者其故有二道藉不通一也民食素陋二也其一可以政爲之其二不可以政爲也當斯密氏成書時英法荷蘭諸國其民通印度者大半無賴之尤且克來福新奪其地有之其於救荒之政無責焉耳

當一歲告歉之始。爲民上者用其咫尺之私智。則制爲穀價。而令其買爲平糶。顧令行而穀不來。非不來也。母之不復不能來也。則由歉而遂至於荒者有之矣。抑有時穀來矣。而以其價之平也。來者有損。而食者不節。則始若無歉。而卒乃大饑者有之矣。是故救荒最善之策。莫若一聽商賈之自爲。求其勿至荒饑以此。救其歉乏之災。亦以此。蓋歲至真歉。不可逃也。極人事之勤能。扞患澹災。使民不流亡至矣。國家此時所能爲者。在通轉運保商賈二者而已。商賈之宜保。莫若此時之穀商爲尤。其有待於保。亦莫若此時之穀商爲切。何則。彼爲匱匱救喪之事。而常爲衆怨之所歸故也。

小民之愚。逢歉歲則怨販穀者。故凶年穀商衆矢之雋。其勢常不足以求利。而反以遭殃。倉廩焚。積聚掠。恆有之事也。而不幸穀商之利。又必與歉歲期。蓋操其業者。常法與生穀之農立數歲之約。以收其穀。其制價也。則通已往之數歲爲之。故其價多一時所稱爲持平者。如近者歉歲之先。每括打麥約。價二十八先令。他穀稱是是已。

至於歉收之歲。彼則以向所平受者。增長其價售之。此其所以爲利也。顧此歉歲所收之厚利。通而計之。亦不過絕長補短。使其業之贏率。與他業均而已。窖藏之所耗。蝕騰跌市價之不可預知。此所以厚實之收。於販穀之業常少也。業之有利。則乎凶年。而不幸其身。又爲叢怨之府。由此而販穀一業。操者少。鄉里自好與身家殷實之人矣。自好殷實者。不爲。故無賴之磨工餅師。與本微品下之人。始爭出以承其乏。出是而生與食二者之間。皆顧利不仁之牙僧矣。

歐洲古昔之於穀商也。知其爲衆怨之府。不徒不爲之解紛。且其情與凡民同。亦不以其業爲可貴。反從而困苦僂辱之。故吾英義都活第六之五六款。令曰。凡糴穀。欲以復糴者。則其人爲閭閻之蠹賊。初犯。監禁滿兩月。釋放。其穀入官。再犯者。監禁滿六月。釋放。罰鍰倍其穀之值。三犯。加桁楊。監禁之。以王令乃得釋。籍其家產。英之所以待穀商者如是。餘國亦未較吾英或愈也。

察吾人先祖父之意。若以謂民糴穀於賈。必貴於糴穀於農。蓋賈者於穀價之外。必



資厚贏而後爲此也。故以爲不義而禁之。且不僅欲禁穀賈。其意常不欲有人焉介於生穀與食穀者之間。是以於穀僧穀傭之時。常加無窮之周防。必深知其人之平稱交易有廉賈之號者。乃許爲之。義都活第六之法。業穀僧者。例必三鄉官公保乃可。其繁重已如此。而至額理查白之代。猶以爲未足也。必議院給憑而後得操之。蓋吾歐古之理財者。於農工二業。用意迥殊。農野業最大者也。工邑業最重者也。禁穀賈而立穀傭者。欲生穀之農。自糶其穀。而糶於農者。非食穀之家。即轉穀之傭介。農生穀矣。又必自爲其穀而穀賈而後可。至於工業反是。凡製造者。禁不得開肆坐列。零售於人。其產貨必其業之商賈承之。其於農也。意以穀爲民食。務使極賤。而不知所以爲賤之術。其於工也。意欲賈業之有利。而恆恐製造者賤價徑銷。以奪其業。而不知其雖欲爲此而不能。

工業製造之家。雖許之以開肆坐列之事。聽其徑售散致於人。其貨價終與他賈同。雖欲跌以爭銷。不可得也。蓋工既開肆坐列而兼爲賈矣。則必有其爲賈之得財。賈

業之母益則工業之母輕有所挹注而爲之者也。使所求之贏率與一時之各業必同。將不獨工業之母有必責之贏息。買業之母所責與之均也。今假歲收什一者爲其地通行之贏率。工買之所同。則其肆所售之散貨必責百二十之息。而後爲不折閱也。當其貨之由廠而入肆也。其計母責償必與移發他買者一律。使其劣此。將工業之母得利不及常率而爲損。當其貨之由肆而售於人也。其計母責償又必與他買之所售者一律。使其劣此。將買業之母得利不及常率而爲損。故其貨之由廠而肆。由肆而散之於用者之家也。不知者謂其收利倍常。而實則二業各本。而所收者仍什一非什二也。利不及此數。則耗虧從之。然則雖聽其自售。彼又烏能跌價以奪他人之市乎。

國家於工則禁之。使不得爲本業之賈。於農則勸之。若惟恐其不爲本業之賈。而不悟二者之皆非。工之得爲賈。其得利不能獨豐於他人。則農之自爲賈。其名價亦不能獨廉於他人。明矣。責之使自爲賈。農與賈之間。其所用之母財。必分其半以實廠。

倉以待他人之來糴其半用之隴畝以期生穀之無窮顧彼之所用於隴畝者不能不責農業之贏利則彼之所用於廩倉者亦不能不責賈業之贏利也是農與賈之業既各用其母財則無論爲之以一人抑出之以兩主其收利必與通行之贏率均而後其事有爲之者惟其業與他業之利正等乃可以不敗而悠久然則國家雖強農人自爲其穀賈彼之名價必不能比他人之爲穀賈者廉也徒破分功之局於民又奚裨焉

夫理財之事既無益者則往往有損工者之操業也用其力於二者不若用之於一者之精也商賈之役財役之於其二者亦不若役之於其一者之有利也同此手足奮於一業則巧習捷給而成物多同此心力竭於一事則周市彌綸而遺利出惟然故其致貨供物能以獨廉而爲餘衆所不及也是故工之兼賈不若分之賈人開肆坐列獨以市酤爲業者其制價常平農之兼賈常妨耕事一邑之中居民環處近者數武遠者百家非得專業賈人司其收發聚散者亦未必能廉也

故使農自爲其賈。與禁工之不得自爲賈。雖二者皆譏。而於農之害尤重。其分工賈而一之者。欲役財者之分。而進之使速也。其合農賈而一之者。欲役財者之合。而抑之使遲也。要之遲速之間。皆爲侵民之事。使之不得自由。以各供其天職。法之不中。莫若此者。且此固非有國者之所宜問也。夫一國之利。莫若厚生之事。一任民之自謀。而無加以束縛騷擾之迹。彼貪多務得者。必不能制廉價。以與他人爲競於市中。而其效常至於自損。故諺有之曰。業廣者貧。然則分者自分。又何必設爲教條。而爲之程督乎。民之自顧其利常精。斷未有國家之爲民謀。轉周於民之自謀者也。夫功分則業精。故分功密者。一群之大利。自有前之政。而農與賈之業不得分利。固不進矣。且極其效。亦將使田疇不治。農一人而二業。其財力分。其日力奪。則所用於執犂耜田者。固有限矣。今使不爲其賈業。則穀麥登場。輒之以拂。麥之以春。固可悉售於穀賈。毋本速復。而更施於田畝溝洫之間。利有餘乎。則田耒之數。日以進。農器之製。日以精。億指之餉。亦日以衆。自其穀賈其自售也。其財之滯於廩倉者大半。滯

於通貨者又多。及田者日以少矣。故其政適以沮田疇之治。田疇不治。穀且日少。是彼所欲求者穀賤。而其效乃反以報之。

夫國家之生穀。固欲其多。而欲穀之多。所宜懷保而勸相者。首莫如農。其次莫若穀商矣。蓋穀商之於農。其所以利其業者。猶他商之於工業也。工得商以通之。而後其成貨速。而無躊躇之弊。其買也。或先貨而與價。故工之用母常完。母完故成貨多。使無商爲承其貨。則彼將求足於散貨之家。抑求之於雜酷之小賈。不必得也。不必得則其母常不周。而其業或蹶。殷商之母常足以復數家工業之母。而有餘。故二者之交通。猶倚一家之大力。以維持數家之小母。卽不幸而有虧折乏絕之災。其禍不至於不勝。而其業猶可以立。殷商之有大資於諸工者如此。

惟穀商亦然。得商以全承其穀。而農之用於田業者。其母常完。夫隔井之災。旱潦之厄。農業所不免者也。有商則緩急可通。而其業無損。自其禁之而農乃仰息於田主。而常受制於穀儲。今使除向者之厲禁。而國有穀商。使農人母財向所不得悉用於

田業者乃今悉收之而惟治田之是用又使農得穀商之助有以通其緩急而天行不足爲之災則通國利源之進與其而達之神有不可勝計者矣

是故養都活之令務使生穀與食穀者之困無一民焉敢於居閭而求利也而孰知是居閭而求利者即所以使旱潦之無虞即以劑豐歉之不齊者乎蓋力能使吾國生穀之日多者田農而外無若穀商矣

政之實不便者雖一時強爲之及其久也將自變故養都活之令雖嚴於始其繼也乃生無數之令以斟酌稍弛之始則藉以更售無論何時皆爲益利矣後乃曰麥價每括打在二十先令下者賣者不禁繼而展其限爲二十四先令俄而又展之爲三十二先令四十先令終之察理第二之十五載下令曰前種穀待售價在四十八先令下者聽之惟種穀而種在三月以內於一市之中者謂之豫屯猶不許雖然自此令行而境內穀商舊有之利權稍復今王之十二載凡穀商豫屯之禁幾皆除之而察理之所著者猶奉行無改也

審察理之令。其中有與世俗同其謬見者。二端蓋令之意。以謂使麥價之貴。至於每  
括打四十八先令。而雜糧與之比例爲貴賤。其時雨之積穀者必多。而民以之病。而  
孰意不然。吾前謂穀麥兩貴。其勢難合。既難合矣。則不能爲積穀病民之事。價之貴  
否。又無論也。且所謂四十八先令者。其於麥雖爲貴價。而當凶歉之年。往往新穀登  
場。價卽如此。莫之積而價已高。則其高也。於雨何涉焉。此其謬一也。令之意又以謂  
麥價過高。則豫屯者衆。如買空者然。潮收奪價。大利坐牢。而民以之病。此又不然。蓋  
使商權於一市之中。欲無幾時不易市而輟之。此其所爲。必預策其市之將乏。後來  
之價。必貴於前。夫而後爲此。而有利也。使其策之不審。而價不時高。則彼將不止於  
無所贏。而收發之費。且莫從出。所積彌廣。折愈不普。是其所損者已。而於人固無傷  
也。使其策之甚審。而後來之價果高。則天災有徵。彼之所爲。不但於國人爲無罪。而  
實且有功矣。何名而禁之。蓋以彼之習於其業。知災之將至。而使衆早爲之所故也。  
夫與其甚饑而至於轉徙流亡。則莫若先爲節議之事。以紓其禍。歲之真凶者。不可

幸而免也。而善亡救敗之術。在稽見糧之多寡。計支時之短長。以制其罄殫之豐。而己矣。彼穀商於此。所以有豫策之智者。蓋得喪所系。則其考之也。必精於常人。而其地勢又便於爲此。是以糴糶騰跌之事。必聽其所自爲。而國家於此。設不幸而有。殿迫禁沮之爲者。未有不助天行爲虐者矣。此其謬二也。是故吾歐民俗。其於穀。商穀賈也。疑忌之情。無異古者之於巫覡。今夫巫之受國不祥。而實無罪。猶穀商穀賈之受怨惡。而實有勞也。自焚巫之令除。而後民不能以虛幻之辭。致無辜之民。被非理之罰。而世俗疑忌巫覡之意。亦從之而漸亡。則知欲雪穀商之枉。而使俗坦然無疑於貴庾閭利之爲者。亦必取舊設之穀法。而盡蠲之。而後可也。（歐俗古謂巫覡能役使物魅執左道害人而立焚燔之律。廢此將二百餘年矣。）

雖察理之令。不能不與世俗同其謬悠。然自其令行。其利進農業而使民享足食之福者。令甲之中。莫與比也。蓋自其令行。內地之穀商。去前此之束縛而爲法令所保持者。得未曾有。因之穀食大通。幅湊都市。農民享報。歌舞郊原。此其由內銷之盛之



所爲過於入口外輸二者之所爲遠矣。考諸穀由外人英之數與每歲民食之比例。不過猶一之於五百七十。而諸穀由英外輸之數與每歲民食之比例。不過猶一之於三十一也。然則內銷之重。較之外至者五百七十倍之。而較之外輸者。亦三十倍也。雖其名數不必皆精且審。而爲政者得此。其於內外之間。當知所重矣。後英麥價大平。未必非察理之令致之。蓋其令行者垂二十五年。萌長發皇。其效尤著顯也。二夫運穀入國。固以使吾穀加多。吾民益飽也。故謂穀價由之而賤則然。謂其必至妨農則不然。蓋其所降減者非穀之眞值。穀之眞值在其所養之民功。此莫能增損者也。使輸入之路大通。吾國農民與田主每歲之所收。雖若遞減。而所得金銀之數。不若禁入之時之多。顧銀數雖減。銀值乃增。所市之物。所雇之功。將多於昔。然則其歲入之數。其用享之資。名減而實不減。銀數雖少。而易權則相若也。易權相若。則其治田播種之事。亦將無殊。且銀值加貴。穀價跌而不騰。他產準之。皆宜降賤。致之外市。便益爭銷。銷多貨通。而國中之百業皆奮。夫國中銷穀之多寡。必以民業之盛衰。

爲比例。民業彌奮。其銷穀彌多。且穀麥之銷於國中。以其市近。最便於農。故銀值之減。正所以廣產穀之銷場。其銷場又爲最便。此其於農爲損乎。爲益乎。使其爲益。則運入之穀商。雖其業有以使國中穀賤。而斷不至於妨農也。

察理第二之二十二載。下令曰。凡運麥入國。國中價在每括打五十三先令四便士下者。每括打稅十六先令。價在四鎊下者。稅八先令。云。觀此令所舉麥價。如四鎊者。從未嘗有。即五十三先令四便士。亦獨百年以前大歉時有之。而如令所云。則非貴至四鎊。麥入口者。必納重稅。此與禁其入國。何以異乎。假使後之行法。其嚴一若立法之初。則遇凶年饑歲。民何以堪。是其令徒以病國也。後幸際遇凶荒。此令輒爲中罷。縱任外麥入國。時時有之。然惟其行法之不一。有以知其立法之不詳也。蓋是令之行。實與外輸之政相表裏。既獎外輸矣。使不禁入。抑加重稅。將麥價不及四十八先令時。外產之麥之輸入者。或無稅。抑稅之而輕。他日更以此麥外輸。反可得獎。如此則國帑徒傷。而一切獎政。凡以爲廣銷本產穀麥而設者。轉以利外產之銷售。故

禁入之政。雖明知其於民不便。有不得不憫然行之者也。

三。以常理言。則運穀外輸。於國中民食。明有所減。其勢自不能以之加多。雖然。自其流極而言之。則雖謂國中之穀。以外輸加多。可也。蓋外輸之穀。所由來者。不出二塗。本國所產。一也。外產輸入之舊。二也。此二者之穀。其數必溢於民食之所需。而後國中有充斥之委積。然使國有明禁。穀而運出之事。不得自如。則生穀者既不願生之太廣。以病其業。輸入者亦不敢致之過多。坐自折閱。二者皆兢兢然持之。惟恐其過。則極其效。直僅足無餘而已。夫如是。則在市之穀。其供常不及求。而外穀之禁。勢有以使其土生穀之量。僅足其民。而莫能過。莫能過。則地利不興。而民食貴。穀獨弛外輸之禁者。其效反此。而且有外銷之利也。

案斯密氏之於穀政也。前既深贊獎出之不可。此又明指禁其外運之非。合前後而觀之。知其旨謂穀之出入。宜一任民之自由而已。蓋穀之外輸。其理猶江河之有湖。載承其有餘。而即以濟其不足。得此則國之穀價自平。無俟常平社倉等之

設也。且有外輸則農常不病而田業日興。至於歉耗之年農斷無舍國中近市而反外運遠銷之理。則亦不慮外輸而無以待歉也。大抵任其自然則自相濟。加之  
以獎則諸弊叢生。非其言之或矛盾也。輒近數十年英之穀政。悉本此書穀之出  
入無稅。以本產之劣於民食。亦從無外輸之事。運入者無稅。故國中穀價得常平  
也。周官大司徒荒政五曰舍禁。六曰去譏。而後之人每逢凶年則有禁穀出鄉之  
事。彼於異國猶可以相通。而吾於一家且不能相恤。此不徒闇於計政之可憂矣。  
當察理第二之十二載。使麥價每括打不過四十先令者。許民輸運出口。而他雜糧  
則以麥比例。爲令十六載。展限至每括打四十八先令。二十二載。又有展令恣民出  
穀矣。然皆有徵權。號磅稅。特稅則至輕。如麥每括打所征不過一先令。雀麥四便士。  
他雜糧則六便士。爲大較。至威廉馬理亞共治之第一載。設獎輸之令。所謂磅稅者。  
於麥價不逾四十八先令時皆豁免。至威廉第三之十一十二諸載。著令穀價即過  
前額亦無磅稅也。

是以外輸之穀。而自彼以來。不獨有獎輸之利。獲即轉運亦殊無滯礙。於境內售穀者。方之儉矣。且其令曰。凡爲外輸屯穀者。無論年價豐歉貴賤。均得爲之。獨於國中屯穀待售。必麥價每括打在四十八先令以下。乃可。顧不知如我前論境內穀商。其利害必與國中食穀者相合。即欲背憐勢有不能。至於外輸之商。其損益轉時與國民相左。今假國中民食騰踊而隣國荒饑。則運穀入彼。自然有利。而逐利無已。運出過多。則於國未必不大害也。深考立法之意。固非求本國生穀之口多。而實則務使穀價常高。而國中之穀。常有供不逮求之象。彼固以此爲勸農之事也。於入國之穀。則沮之。雖在下稔之年。民所食者。必盡出國中之所產。於出國之穀。則獎之。雖在下稔之年。穀價之昂。至於四十八先令。每括打矣。而民於國產。尙不得全而食之。農固勸矣。如通國之食穀者何。惟其政之不中。故其勢乃不能以自行。而有時不能不自亂其例。乃有暫行禁穀出口。盡弛入口穀稅之令。以救其政之不可通。夫政而前後違反如是。則不中之故。雖愚者可以瞭然。何假深辨而後悟其非哉。政之適理者。

固無事於具舉更張也。

向使諸國之於穀政也。因任自然。盡弛出入之禁。則相爲通轉。無異大國之列州。既可免荒。而歉年亦不至於甚病。一洲之中。天時地利。至爲不齊。旱潦所被。從無遍及。此歉彼豐。其爲相通勢至便也。不幸列邦之民。能知此而使商務之靡然自由者。絕少。惟務沮抑。驅迫使悖理害人之政。樊然並臻。而後天災之烈。乃有熾然不可磨避者矣。且惟不素通。故有時大國遇荒。以需穀忽多。隣境小邦。不敢縱粟出國。知退糴閉關之事。一大爲倡。群小斯和。雖有善政。不能用也。歐洲穀政。若瑞士義大理想間之小部。誠不可不立外輸之限制。獨大國若英若法。產穀至多。即縱外輸。不至生害。無事其爲此也。大抵農爲生穀之業。必立條禁。使不得趨最利之市售之。無論於一國之政。爲何如。實皆侵民自由。奪其應享之權利。故非甚不得已。穀之出國。本不宜禁也。

觀各國之穀政。與各國之教政。有相若者。蓋民生日用之間。其繫心最切者。當前之

事莫若口體所資。未來之生。莫若罪福異報。繫心既切。於是各有主張。爲政者不得不循循業情。爲之法令。而無如民之所主張者。未必皆當也。故二者之政。雖所關於民生至重。而見諸行事。則合理希也。

案英國今日計家幟志。莫若馬狹爾。馬嘗謂計學爲人事中最大之一支。而計學之外。則莫若教宗事天之事。民品之高下。風俗之醇漓。大抵此二者爲之。他若文章爲娛情之用。兵革爲爭奪之器。於化之進退。雖常爲大因。究不若計與教二者之不可須臾離也。其言蓋本於此。

四、捐商運穀入關。將以復輸出國者。其業亦能使國中之穀加多。捐商售穀。多在國外。然使在內可售。就令其利稍遜外輸。亦所欣願。蓋不待外輸而售。一切轉運之費皆省。故國有轉穀之商。則地爲積聚之區。其民無乏絕之患。雖有時國中穀價由之賤。而名賤實否。往往穀之見賤者。由銀值之見貴也。

吾英於穀麥捐業。雖所不禁。而入口有關權之重。運出之頃。又太平斬其掣還之利。

益則與禁絕無以異矣。惟凶歉之年穀痛騰躍入口乃免稅耳。而當此之時以穀出  
國又法所不許者。其條令糾紛多窒如此。然則穀麥枹業謂之禁絕不行。蔑不可已  
山前而觀之。知吾英之穀法其用意造謀大抵與設爲獎令者同出於商宗之計學  
商宗計學者以多積金銀爲本者也。使吾說有可信者存。則時人衆口交稱謂其政  
之利行者甚無謂矣。彼以謂自其政行吾國日富。獨不悟此果之起於他因。而絕非  
穀法之所致也。今夫國之能富必本於民之勸功。而民之勸功必本必政刑之克中  
身家之安固。吾英之政其他不可知。民之身家可謂固矣。其勤動所收之利實安然  
享之。雖王公勢豪莫能腹剝之也。有此則國皆可興。法令細者雖少違謬不足害也。  
況吾英自戈洛慕爾革命以來所以禁防君上者愈周。其所以申民權者愈至。民方  
自謀以漸其資生之日進。使任其自爲而莫之煩黷。則國殖之潛滋萌長誠有非常  
識所能窺者。匡翼勞來徒虛語耳。苟不苦之民固無所求助於其上也。即令其國之  
舊章所以阻窒其進者猶多。而自由衆致之力常有以掃除勝越之。使前人愚諄厲



階不終爲梗。夫所謂前人愚諄厲階者。不過侵民自主之權。而令所享之利實遜耳。然使其大者既竭。則小小者將不期而自泯。今吾英民之享實固甚安也。雖其權尙未足爲大仲公道尙未足爲大著。而以較歐之列邦之政俗。則其仲與著莫與京矣。國之日富。由此於穀法何關焉。事固有其相從而不得爲因果者。此類是也。今必謂國之日富。見於穀法既施之後。故穀法必爲日富胎基。則吾英自國債不替以還。而後見富厚之實。將亦謂富厚爲國債之後效乎。必不然矣。

前謂凡國法令如獎外輸之屬。推其流極。皆與波陀噶爾西班牙之禁金銀出國者同科。蓋皆有以使銀值日賤故也。然而同矣。顧吾英乃歐洲至富之邦。而波西二者則爲窮丐無俚之國。何耶。其故有二。彼波西者。本極貧之國。總其進口貨數。不過六兆鎊有奇。金銀非衣食之品。乃西則加重權。波則立厲禁。關譏禁嚴。使二者不得出國。而爲無益之饒。此其事雖與吾英獎穀麥出口之政同。而於使銀日輕。其輕重紆徑之效。固大異也。此其故一也。吾英政策之愚。雖不止於獎令。然察其民權則大仲。

觀其民產則甚固其安集樂利有以救其失而有餘而波西民之力役既無其自由其收成享實又恆有暴豪壓奪之害朝政教宗皆本數百年之舊制其積弊滋深國病民貧猶不知變夫如是則雖其中商政盡法美意良無救其爲窮而無理之國也此其故二也

吾英今王（若耳治第三）之十三載於穀法頗有更張一時議者咸以爲善顧自我觀之得失正參半耳其於古法經更張而善者固多而經更張而失者亦不少也穀麥進口之稅減民食以廉而外輸之獎未盡去也運入以爲出者則免其關稅而官爲之屯此其利捐業過舊法遠矣而運穀出國所定穀價之限則又皆過狹故曰得失半也雖然梳倫不云乎吾法雖未盡善而於一時之人心民智國利地形則盡其所得爲而不可復加者矣法國有明知其善而不可行者則莫若先其可行以俟他日之更進也

案斯密氏此書於商宗計學之說可謂辭而闕之廓如者矣自今日而觀之不知

當日歐洲主計者直何所蔽其見之頗謬至如彼也誠使必金銀之多而後爲富則西班牙波陀噶爾宜爲強國於後而墨西哥秘魯宜爲大國於前何皆窮丐無俚而卒稱富強反在英法諸邦之無一金銀礦者雖主愚人宜以悟矣乃當時明此者至少而幾於絕無則其矣習之間人而能達之者寡也且豈僅當日之歐洲而已即今中國時務之士其不持漏卮之說與夫輕出重入之旨以言稅者亦幾罕觀則於古人又何責焉自乾嘉以還西國專家之士治計學日精童子入塾則取其大經大法教之以視斯密氏此書其深淺疏密殆不可同年而語矣顧不佞之爲譯乃獨有取於是書者則以其論之中於吾病者方多不徒登高行遠必先卑邇已也此亦梭倫造律先其利行之義也夫

篇六

論通商條約

今使一國之於商政也於物產之出入於某國獨優立之條約中載某貨獨許進口

銷售餘國則禁之某貨進口獨免關排餘國則征之此獨優之國之商工由是於彼有壟斷專利之實其銷場必由是而益廣其市利必由是而益豐益廣者以其拒人而納我也益豐者以國爲所壟斷而制價得以加昂也則以此約之故必享大利明矣。

雖然此約也於所優之商工則利矣而於優之者之商工則有損也既許之以壟斷其來貨將不貳而自昂必不若平等兼收之廉賤也來貨既昂則所出之本產吾所持以與爲易者必賤交易之道此屈則彼伸言彼貴者無異言此賤也是故自此約立吾國歲產之易權乃遜雖然遜矣而猶未至於虧折也價雖賤不能比於經價而猶微也經價者必復其母而加所通行之贏率也使不及此勢不可常故優人者雖有所損尙有所贏也。

今有條約與此理反而群以謂利行則吾不知其所據之爲何理矣彼方與人爲約許之專利於某貨以自伐問其所以爲然則曰得此而後吾之出貨過於彼之入貨。

以坐得其二品以補進出之差此所以爲利行也一千七百三年吾英與波陀噶爾通商英使麥端所與立之專約正如此約書三款如左方

第一款至神威武波陀噶爾大王自其身至於後嗣允許英國所造呢綢及一切毯氈之貨進其國口一如舊章至於另立國律禁止之日爲止惟其事須照後二款行方爲如約

第二款至神威武大不列顛太后王自其身至於後嗣亦須允許波國所產之葡萄酒進其國口波酒運至者無論裝筒或木罇或甕首度量相同則照法蘭西所運至之葡萄酒稅三減一英法兩國爲和爲戰英於波酒之稅無論或徑或紆或別立名目均不得有所多取假如所減稅則英國中有議變者或有以爲不然者波國大王即將英國所造呢綢及他項毯氈貨物禁止勿納不爲背約

第三款兩國全權大使各保此約既成國王無有異議自兩使畫諾後以兩箇月爲限即將國王簽名親允之約互換

此約既成。波陀噶爾國家有必納英成呢劇之責。其關稅則屬於未禁之先。不能別有增益。顧必納者非專納也。其所許於英者。亦不過與所許於法荷諸國者等耳。非有獨優之利也。而英之國家所許於波者則不然。既納其釐矣。而稅權則必比餘國爲加輕。他國三而波則二之。故此約以常道言。於波利於英無所利也。

乃吾英講於外交之家。獨以此約爲極妙之政策。則聳於得金之多也。不知波陀噶爾歲取巴西之金。以供國中之用。猶有餘積而藏之。則停利之所亡甚鉅。出而徒轉之於國中。又無從而得利。則雖有其嚴之禁。其勢不能不出國也。出國以易外貨。售之本國而後利生。故波陀噶爾之金。所歲致於英者甚夥。凡皆以易英貨抑他國之產。而由英轉售者也。吾聞巴勒譚言。驛船走波陀噶爾者。其潛金入英。每七日數約五萬鎊。此殆過實。果爾。是由波入英之金。歲乃二兆六十萬鎊也。巴西每年所產不及此數。以是知其誕矣。

疑者英商之在波陀噶爾。所得利益。大半非條約之所爲。多隨時乞假沾丐得之。以

其王之加寵英民故吾英於波誼亦日篤有事常陰助之繼而吾商與王違言前許之利益大半奪故先謂與波交通之利者至是皆自叛其說言與波交通之無所利又謂由波歲至之金非英力所能致而餘國實爲之波之果酒人英與英之呢綢入波其值約相抵英國未嘗獨利也云云

巴勒諦之言如彼而諸商所云如此二說如是其違反也自我觀之就令由波來此之金悉英貨之所易得者且所得者不止於巴勒諦所言之數然而其事不必較之他國之通商爲特利也吾產之所往幾何彼產之來其值恆與相抵他國通商如此波之通商亦如此也烏能以金故獨過乎

且由波所至之金其用諸國法與盤孟驅飾者爲數常甚微則其金之至我將有大分不能積以藏之而必轉以易他國之貨物者無疑也既必出以易他國之貨物矣則與其先易波之黃金而後由金與之更易也何若徑以爲之而易之以吾英之成貨乎夫二商業等紆者之利常不及徑吾之前論既明之矣蓋所致之貨多少同徑

者之母自寡然則使吾英工商成貨以與波通者爲其少以與他國通者爲其多少以致其金銀多以致其他貨金固得也而百貨亦自集二者皆徑將所用之母財必節於今遑矣夫如是則母財有餘有餘將以營新業其民功之所鼓者愈衆而歲殖之所進者愈多

即自求金之旨言之縱波陀噶爾絕不與英通而英之得金猶自若爲國法乎爲盤孟乎爲驅飾乎爲購貨於外國乎苟有所需將皆自至不虞其乏也黃金與他物等耳有所與易者則不擇地皆可致且波陀噶爾之金既過其所需矣雖爲之嚴禁深防十重之關百里之郭其金之外流自若也他國得之必出以爲易者猶吾英得之必出以爲易也以貨得金於波陀噶爾者爲其一而徑以貨得金於餘國者爲其二而紆爲其紆者固費於爲其徑者顧二者之爲異至微雖置不問無害也

或曰吾英歲進之金皆波產也其餘國之通商吾之進出差大抵皆負其爲正者甚少又皆微然則波有大造於吾英也不知國之進金亦有其域其出於一國者既多



則其山於餘國者自少。蓋其物與百產同。民之求之。既足所需。則不復過。其由於一國者。既盡其什九矣。則由於餘國者。不能過什一也。且使由於一國者。歲之所進。過於所需。周於泉幣器飾之用。而猶有餘。則其出以輸他國者。且不可止。今之言財政者。大抵熒於至無謂之進出。差然使其差於一國之爲正者過多。則見於餘國者。將無往而不負。其爲物固有制域。此盈則彼虛。不可以法而強爲也。

案斯密氏計學。於此等處最窺其深。其理已與後賢所謂全力常住不可增減之例。通而爲一。在當時而能如是。誠命世之才。宜乎其能爲一學開山也。

是故有謂吾英商務。非波陀噶爾不足以自存者。其說爲大愚。而時人則信之者衆。近者戰事將開。法與西班牙於吾英無所責過。而遽令波陀噶爾閉海。且將英船盡驅出國。而於波國各口。循置法西二國之戍兵以爲守。則彼之所爲。亦猶前說之意也。假當日波王忘其國體之傷。而俯首受此無名之約束。其於波固大損。而於吾國不獨無害。抑且利之。蓋前約成。其所害於英者。不過失一波國商場已耳。而波以

至弱之國。通國之間。一可無恃。以其與我爲聯。我以全力持之。此可一幸而不可再微之事也。前約成。而我從此息肩。夫非甚利者耶。非不知波國商場果去。吾商之業於彼者。將甚不便。收母他營。非一二年不集事。顧英之所失。實止於此。以較用吾全力。持一弱鄰。使全國之民。困於軍旅饋餉者。豈可等而論之也哉。

惟金銀之人國也。其所以爲泉幣器飾之需者少。其所以爲通商外國之用乃最多。夫前謂通商。以物易物者。徑以物易金。由金復物者。紆推之一易者。徑再易三易者。紆故紆之爲轉。不獨金可爲也。而惟金爲最便。最便故最利。蓋其物爲天下之易中。爲人人所樂受。本值重而易挾。其轉運之易。爲百貨尤。而磨損毀傷之費至微。是故商出本產。以致一貨。復以此貨致彼。以銷國中者。其爲之中。莫金銀若也。吾英所以與波陀噶爾通而有以利國者在此。此固不必爲最利。而其利之不細。則誠難誣也。案此篇專論波約。以明商宗用意之非下緣論用金。因並及國法爐費。

其取以爲泉幣器飾之需者。雖有待於外供。顧亦至微少已。此不待論而可知者也。

故雖波陀噶爾與我告絕而吾英求所以爲此者於他所亦易易耳吾國攻金之工其歲中所爲鎔范鑄鑄之事雖若甚煩顧其所以爲新者大半皆舊者之所化則有待於外來之增益者固甚少已

至於國幣亦然今吾國每年所造之幣金者八十萬鎊有奇然造者雖如是之多而其所歲增者實劣於此數甚遠此又衆所共知者也蓋吾國造幣之費全出於官同是金也其在幣與在鑄之異不過持以入局需旬月之延宕而已故在幣之金雖新出於范與在鑄未造者重同則值不相遠獨用久之幣則多消磨而輕或穿翦取鎔往往遜其初制吾英於圖法未脩之初金之下法錢者約百二而銀約百八也四十幾尼有半之新幣以易一鎊之金於市而有餘四十四幾尼有半之舊錢以易一鎊之金則不足故在鑄之金雖局價爲四十六鎊十四先令六便士而市價則四十七鎊十七先令有時至四十八鎊焉蓋當國幣多損之秋雖有新幣入市不能區而用之也則民常日處於有餘其受之也亦與通行之常幣等耳獨至取而鎔之則新

舊之異見。所謂四十六鎊十四先令六便士者。使爲新幣。可得一磅法金。而收四十八鎊之市價。故國法未脩舊幣猶用之日。雖歲有造幣。而民爭私銷。非嚴法峻刑所能禁也。當是時也。官泉局之造幣。猶賓涅羅妃之織網焉。一希臘古史載。夏時希臘群島會長征安息之杜雷國。有小島意達加。其酋名烏諦西者。最多智。爲羣酋謀主。杜雷國既破。烏諦西浮海遇風波十餘年。不得返國。賓涅羅妃其婦也。美而賢。諸酋居者爭欲得之。謂賓其夫已死。賓言曾對神誓。織一網必網成而後可嫁。於是畫織者夜輒解之。如是者幾十年。而其夫卒歸國也。一畫之所成者。即前夕之所解者耳。泉局之造幣。名爲歲八十萬。非所加於國幣者。年有此數也。乃以彌縫每歲之所銷毀者爾。然則其事亦等於攻金之工。號爲新者。多其舊者之所化。則所需外金之增益者。又不必多也。

使民攜金銀至泉局。轉之爲幣。其一切治範之費。出諸私家。則在幣之金。貴於在錠。將無異成器之金。必加工費矣。爐費所加。無異國家取成幣之金。而陰加之以國稅。

蓋造幣乃國家獨有之利權。視所加之幾何。而通國之幣皆如此。無有此貴彼賤之殊也。然必所加者少。而後法行。使爐費加者過多。逾其治范所需之實。將境內封外盜鑄之姦。遂起。爐費愈大。盜鑄愈多。制幣之值。因之以減。法國泉局成幣。其爐費逢百取八。然時無盜鑄之姦者。蓋盜鑄之利。不酬犯憲之險。爲之於境內則身危。爲之於封外則爲之轉運者危。其事尙非百得六七之利。所能補苴者也。

法以加征爐費之故。在幣之金。貴於在鈔。一千七百二十六年。律定每馬克精金。一法以八翁斯爲一馬克。一色廿四加勒者。一加勒本衡名。廿四加勒爲一翁斯。其後乃以第黃金成色。假如淨金。稱色廿四加勒。蓋一翁斯中純黃金。而無雜質也。若一翁斯中雜銅。或他質。二加勒者。則稱其色爲廿二加勒。餘仿此。今英國金磅。其色廿二加勒。有奇。金表。驅飾諸物。色十八加勒。其他金鍊諸物。則用十四加勒。者。英美兩國入市金器。大率如此。又寶石。衡量。亦用加勒。廿四加勒爲一馬克。十二分加勒爲一古來音。譯言黍。加勒譯言菽。一其價七百四十利佛九絲。一登業有十一分登業。

之一而造幣法金色廿一加勒有四分加勒之三雜二加勒有四分之一之銅故以比例計之法金每馬克其價不得過六百七十一利佛又十登業也而泉局鑄之爲幣時乃範之爲金盧夷者三十枚枚抵二十四利佛是馬克爲七百二十利佛矣是則在幣之金貴於在紙者每馬克得四十八利佛十九蘇二登業也

故國幣有爐費或局捐者則私毀常無利即有矣而其利亦甚微蓋私毀盜鑄之利皆存於國幣名實不同之間名過實則盜鑄不及實則私毀今使名不及實之差無於爐費則私毀不獨無利且有損矣等於爐費則無利損惟過於爐費者而後有利至幣無爐費則毀者之利滋多此其大略也故吾英當圖法未脩之初使有值百取五之爐費則毀者將值百而失其三又使爐費爲值百取二彼將無所利損使爐費爲百一則毀者之利亦百一惟無爐費故其利有百二也一以其時通行金幣劣於法錢者百二故爾一故國之用幣以枚而不以重者欲杜私毀外運之姦莫若加之爐費無爐費則幣愈新權色愈正者其私毀外運之姦乃愈滋也

考英幣所以無爐費之山蓋嘗察理第二之代欲民之出其藏鏹以爲造幣故豁免爐費而立之限期是後或行或罷至於一千七百六十九年而著爲永令矣英倫版克欲存款之周於待支則時時有鏹以入局兌換成幣之事其意亦謂國家免其爐費爲利於版克之一端而國家亦以版克之故重違其意故免費亦遂著爲永令然而交易用金出入必衡之事既甚不便而不可行而用金以重言者又不若以枚計者之爲愈則國家圖法正英倫版克群商所宜保持而使之無弊者而宜知造幣免費以滋私毀雖若利於版克而實未嘗利也顧彼之於計以不利爲利者豈此一端已哉

圖法未脩之先通行泉幣磨損劣於法錢者百二以無爐費故名過實者亦百二而版克收買金鏹交局鑄錢所受虧耗則亦百二假使當時有百二之爐費則通行泉幣雖經磨損不及足重之法錢而其值則與每枚中應有之金等蓋爐費之所加與磨損之所減者正相抵也故版克雖出百二之爐費以與泉局其所失者實止於此

數通前後爲計未嘗多也。又假使造幣之爐費加爲百五而通行泉幣損者百二則版克於收買金錠之時將有百三之獲而入局造幣須出百五之費如是則通前後爲計其所失仍爲百二未嘗多也。又假使造幣之爐費減爲百一而通行泉幣損者百二則版克於收買金錠之時將有百一之失而入局造幣須出百一之費如是則通前後爲計其所失仍爲百二未嘗多也。總之使造幣有費而通行泉幣色足權作則版克所失之於爐費者仍得之於收買金錠之時所得之於收買金錠者必更出之於爐費二者互爲消長而版克無所贏細於其間故通前後爲計在此與在前二者同其無費版克無所贏其有費版克無所失也。

國家於物產之征收薄則竊關逃稅之姦日穰群隨之以轉運爲業者名出賦稅非真出也。出者乃用物銷貨之家商代先納耳。未有不還取諸市價者也。泉幣百貨之一也。國有征稅行諸爐費之中而其爲用也則人人皆通轉之商收之將以爲出無所謂用物銷貨者矣。故使國家之於泉幣所征甚微而盜鑄之姦不作則其稅有先



納無終出之者。何則。其爲物不居。取之所以爲予。方其取則納稅。及其予則取償之矣。故曰泉幣之征。有先納而無終出。

然則造幣而加爐費。於版克之費無所增。於持金銀易幣之人無所損。造幣而免爐費。於彼亦未嘗有益也。蓋無分爐費之有無。但使既成之幣。色足權倖。造幣之費。於民無損。惟權色不齊。則名實之異。造幣之費當之矣。

故國家爲民造幣。而不取其費者。不徒有損於度支。而實難可收之賦稅。且費而不惠於版克。洎夫私家之民。均無益也。

今使有以前說告版克者。彼將掉頭而不顧。何者。以充吾之說。不過杜其小失。不能使有所贏也。雖然。使吾英之國法常如此。而大數出入。猶以重論而不以枚。則雖用吾說。其於版克誠無所利。獨使論重之俗。且募改。而金銀磨損。一如國法未脩之時。則吾說果行。版克之益將甚不訾。蓋以錠往以幣歸者。獨版克之款爲最鉅。每歲之費。泉局當之。向使泉局造新。不過以補苴。失亡更易磨損。則極其數將五萬。至於一

億足矣。乃往者每歲鑄錢。不僅爲此。其大分則以塞私毀外流之漏卮。故圖法未脩。之十餘年。每歲造幣。乃至八十五萬枚之多。向使金幣爐費百加四五。則私毀外流。所爲無利。無利則不待禁而漏卮塞矣。夫如是。則英倫版克每歲造幣八十五萬枚。其中所失百幾二五之費。可以大減。夫八十五萬之百二五者。二萬一千二百五十鎊也。使吾說行。其所失者或不及什一。夫此豈曰小補之哉。

議院每年所籌造幣費。不過一萬四千鎊。而泉局所費。如辛俸正雜者。僅半此數。故就令取此費而省之。卽或加以征抽。其數亦不能甚鉅。此皆於國微。主計者置爲不屑留意。宜也。顧自版克言之。使所省者歲可至二萬鎊之多。則宜所加意者矣。且此非徒懸之虛論也。其事既見之於前。自可復出之於後。出則吾策之善否驗矣。

右所考論。皆泉幣之事。於通商條約所涉蓋微。則以位置之宜言之。應在部甲論泉幣之篇。抑附於論價值市價之末。顧論之於此者。蓋造幣之所以無費。其事起於勸民。而以造幣勸民。其旨本於商宗之計學。是宗學者。非金銀不足以爲財。非泉幣不

足以言富。國家蠲微費而裒多金。政之便宜莫過此者。夫固彼學富國之事之一端矣。此吾所以不出於前而出諸此篇之微意也。

案英國至今其金鎊造幣之費猶出於國家而先令便士則名實之所差甚鉅其造幣之政雖與古同而其所以然之旨則大異學者所宜深察也。